

元史

二



元史類編卷之二

仁和邵遠平戒山學

南沙席世臣郢客氏校刊

天王二

世祖皇帝諱忽必烈太祖之孫皇子拖雷第四子憲宗同母弟也
以乙亥八月乙卯生及長仁明英睿思大有爲於天下歲辛亥憲
宗卽位諸弟惟帝最長且賢故盡屬以軍國庶事南駐瓜忽都之
地亦曰金蓮川于是徵姚樞于蘇門待以賓禮初太宗立軍儲所于新衛

收山東河北丁糧後惟計直取銀帛帝請於憲宗築五倉于河上
始令民入粟宋兵時侵南境帝請置經畧司于汴以史天澤楊惟
中趙璧爲使俾屯田唐鄧繕城以備宋兵壬子夏奉命征雲南癸
丑受京兆分地遣將戍興元諸州又奏割河東解州鹽池以供軍
立從宜府于京兆屯田鳳翔募民受鹽入粟轉漕嘉陵更立京兆

宣撫司以廉希憲楊惟中為使徵許衡為京兆提學設交鈔提舉

司印鈔以佐經用其法以絲為本每銀五十兩易絲鈔一千兩諸物之直並從絲例秋出師臨洮次忒刺分

三道以進帝出中道至滿陀城過大渡河經山谷行二千餘里抵

金沙江乘革囊以濟摩娑蠻主迎降在大理北四百餘里冬師至白蠻打郭寨

其下堅壁拒守攻拔之不戮一人進次三旬白蠻送款軍薄大理

城時大理主段興智微弱國事皆決于高泰祥祥率眾遁去帝命

大將野古追斬之分兵取附都鄯闡烏爨等部進入吐番渠長峻

火脫懼出降遂班師甲寅冬至自大理入覲憲宗受命駐桓撫間

建城龍岡初憲宗分漢地封宗屬而雅愛帝欲重之權命於汴京

關中自擇其一帝已得關中至是憲宗曰關中戶寡河南懷孟地

狹民夥可取以自益于是盡有關中河南之地會有讒帝深得中

土心者憲宗疑之命阿藍答兒行省事于京兆劉太平佐之鉤考

河南陝西諸路財賦置局關中大開告訐帝用姚樞計盡遣妃主歸朝自見憲宗于六盤山相持各泣下竟不令有所白而止遂罷鈞考局而帝所置諸司亦廢憲宗將分道伐宋命帝征鄂州戊午冬自龍岡啟行己未秋次汝南戒諸將毋妄殺命楊惟中郝經宣撫江淮八月入大勝關宋戍兵皆遁進次黃陂九月駐師江北宋相賈似道統兵來援適親王莫哥遣使以憲宗旨問至且請北歸繫人望帝曰吾奉命南征豈可無功遽還自登香鑪山俯瞰大江江北曰武湖湖東爲陽邏堡其南岸卽澣黃洲宋以大舟扼江渡軍容頗盛帝遣兵夜具舟遲明至江岸風雨晦冥諸將皆謂未可渡帝不從令揚旗伐鼓進天爲開霽與宋師接戰者三殺獲萬餘人逕達南岸屯兵圍鄂州似道懼密遣宋京如師願稱臣納幣請和帝不許攻益急俄聞先朝諸臣阿藍答兒渾都海等謀立帝弟

阿里不哥輒乘傳調兵去龍岡僅百餘里會似道再造京至約歲

奉銀絹各二十萬帝從郝經廉希憲議許之十一月大軍北還輟

錄云世皇軍次黃河苦乏舟夜夢老叟引至一所指曰此可渡也帝以物標識之乃覺明日循行河澗間忽有人進曰此間水淺可渡帝曰汝能先涉否其人乃行大軍自後從之皆濟帝欲旌其功對曰富貴非所願但得自在足矣遂與五品印撥三百戶食之十二月帝駐燕京近郊縱新僉民兵人心

大悅

中統元年庚申宋理宗景定元年春三月戊辰朔日食車駕至龍岡新城親

王合丹莫哥增察兒等率東西二道宗王來會與諸大臣皆勸進

辛卯帝即位大方通鑑云促鑄寶象一治而成衆皆慶賀夏四月戊戌朔初定官制以王文統

為中書省平章政事張文謙為左丞初太祖設官甚簡以斷事官曰扎魯忽赤任至重位三公上丞相謂之大必閣赤掌

兵柄則左右萬戶而已後稍倣金制置行省及元帥宣撫等官帝乃大新制作其總政務者曰中書省兼兵柄者曰樞密院司黜陟者曰御史臺其次內則有寺監院司衛府外則有行省行臺宣慰廉訪其牧民則有路府州縣皆以蒙古人為之長而漢人南人副焉一代官制漸備辛丑以即位詔天下曰朕惟祖宗肇

造區宇奄有四方武功迭興文治多缺五十年於茲矣蓋時有先

後事有緩急天下大業非一聖一朝所能兼備也先皇卽位之初風飛雷厲將大有爲憂國愛民之心雖切於已尊賢使能之道未得其人方董夔門之師遽遺鼎湖之泣豈期遺恨竟弗克終肆予冲人渡江之後蓋將深入焉乃聞國中重以僉軍之擾黎庶驚駭若不能一朝居者予爲此懼驛騎馳歸目前之急雖紆境外之兵未戢乃會羣議以集良圖不意宗盟輒先推戴左右萬里名王巨臣不召而至者有之不謀而同者皆是咸謂國家大統不可久曠神人重寄不可暫虛求之今日太祖嫡孫之中先皇母弟之列以賢以長止予一人雖在征伐之間每存仁愛之念博施濟衆實可爲天下主天道助順人謀與賢祖訓傳國大典於是乎在孰敢不從朕峻辭固讓至於再三祈懇益堅誓以死請於是俯徇輿情勉登大寶自惟寡昧屬時多艱若涉淵冰罔知攸濟爰當臨御之始

宜新宏遠之規祖述變通正在今日務施實德不尚虛文於戲歷

數攸歸欽應上天之命勲親斯託敢忘列祖之徽誕告多方與民

更始丁未以郝經為國信使何源劉人傑副之使宋議和且徵前

約丙辰置急遞鋪僉鋪兵一晝夜行四百里以速軍機乙丑徵諸

道兵六千五百人入宿衛此在內設立禁軍之始較耕錄云其卒謂之怯薛及怯薛者猶言分番直宿衛也以太祖功臣博爾忽博爾木木華

黎赤老温四族世領怯薛之長太官怯薛者分宿衛供奉之士為四番番三晝夜凡上之起居飲食服御諸政令怯薛之長總焉年勞既久即擢為一品或以才任使貴盛雖極一旦歸至內庭則

執事如故自此日漸增設一朝有一朝之怯薛歲賜鈔帛以億萬計國費大耗于此又貴出赤者快行是也每歲一試之名曰放走以足力便捷者膺上賞監臨官齊其名數而約之以繩使無後

先然後去繩放行在大都則自河西務起若上都則自泥河兒起越三時走一百八十里直抵御前俯伏先至者賜銀一餅餘賜緞疋有差

水軍禁私商不得越境犯者死阿里不哥僭號于和林五月戊辰

朔建元中統詔曰祖宗以神武定四方淳德御羣下朝廷草創未

遑潤色之文政事變通漸有綱維之日朕獲纘舊服載擴丕圖稽

列聖之洪規講前代之定制建元表歲示人君萬世之傳紀時書

王見天下一家之義法春秋之正始體大易之乾元炳煥皇猷權
輿治道可自庚申年五月日建號中統元年惟秉錄握符之始必
立綱陳紀爲先故內設都省以總權綱外置諸司以平庶政仍以
興利除害之事補偏救弊之方隨詔以頒於戲建極體元必因時
而著號施仁發政期與物以更新凡在臣民各宜遵守甲午以阿
里不哥反赦天下詔曰我國家列祖肇基先皇繼統惟圖日闢于
疆宇未免歲耀于兵威事有當爲時難遽已朕獲承丕祚已降德
音念士卒暴露者久之而人民離散者多矣干戈載戢田里俾安
不期同氣之中俄有闖墻之侮顧其冲幼敢啟茲謀皆被姦讒相
濟以惡彼旣階於禍亂此當應以師徒朕惟父母兄弟之親宗廟
社稷之重遣使敦諭至於再三怙惡執迷曾無少革以致神人共
怒殺伐用章重念兵方弭而復徵民甫休而再擾危疑未釋反側

難安望誤恐及於無辜拘囚或生于不測非朕本意盡然傷心宜
推浩蕩之恩普示哀矜之意於戲悛心或啟忍加管蔡之刑內難
既平迓續成康之治咨爾臣庶體朕至懷詔頒新政一求直言曰
朕自卽位以來宵衣旰食孜孜求治然天下之大萬事之衆非一
耳目所周知也自今凡政令之未便人情之未達朝廷得失軍民
利害有上書陳言者皆得實封自獻其在內者赴省聞奏在外者
投宣撫司申省轉奏卽言不可採並弗加罪如其可用則優之遷
賞以旌忠直一理寃滯曰凡犯刑至死者如州府審問獄成卽行
處決則死者不可復生斷者不可復續案牘繁冗須臾決斷萬一
差誤悔將何及人命至重朕實哀矜今後凡民間犯死刑及部曲
獲重罪鞫問得實先具情事始末奏聞待報然後寘諸法一均賦
役曰爰自包銀之法行積弊到今民力愈困朝廷立制本欲利民

而反以害民非法之弊乃人弊之也蓋由濫官汚吏夤緣侵漁科
歛則務求羨餘輸納則暗加折耗以致濫刑虐政暴歛急徵吾民
安得不重困耶舊弊苟不悉除新政何能得立今後應科差發斟酌
民力務各均平期于安靜俾吾民共享有生之樂一撫軍士曰
大軍每年征進行者有暴露之苦居者負輸輓之勞加以管軍頭
目不知存恤橫派科歛多致騷擾不安朕甚憫焉今後禁約諸路
管軍人等毋得循習舊弊凡軍前効力功績顯著者速行遷賞例
從優厚至于撫綏安養使大軍皆得休息者朝廷別有區處一止
貢獻曰開國以來庶事草創旣無俸祿以養廉故縱賄賂而爲蠹
凡事撒花等物無非取給於民名爲已財實皆官物取百散一長
盜滋奸若不盡更爲害非細始自朕躬斷絕斯弊除外用進奉軍
前克敵之物并幹脫等拜見撒花等物並行禁止內外官吏視此

為例俱見典章乙未熒惑入南斗留五十餘日分漢地為十路置宣撫

司寶典赤李德輝燕京路宋子貞益都濟南路史天澤河南路楊

果北京路張德輝平陽太原路劉肅真定路姚樞東平路張文謙

大名彰德路粘合南合西京路廉希憲京兆路皆宣撫使定戶籍

科差例分全科及減半科納絲輸鈔有差凡儒人及軍站僧道等

戶皆不與僉平陽京兆兩路兵七千人于延安守隘此在外設立徵鎮戍軍之始

諸路兵三萬衛京師六月戊戌以李璫為江淮大都督阿里不哥

使劉太平霍魯懷入京兆謀為變廉希憲至捕誅之并誅乞帶不

花于東川明里火者于西川大盤守將渾都海起兵應阿里不哥

反秋七月癸酉以趙璧平章政事張啟元叅知政事王鶚翰林學

士承旨史天澤兼江淮諸翼軍馬經畧使丁丑設祖宗神位于中

書省遣官致祭用登歌樂初祭享之禮割牲奠馬酒以蒙百巫祝致辭至是乃一變帝自將討阿里不

哥八月己酉立秦蜀行中書省以廉希憲為右丞行省事勅軍士
所過毋擅撻辱官吏九月壬午初置拱衛儀仗及祭器法服陝西
行省丞相阿藍答兒自和怱起兵至西涼與渾都海軍合丙戌命
諸王合丹哈必赤率師敗之于姑臧擒斬之西土平冬十月癸丑
初行中統寶鈔自十文至二貫文凡十等不限年月諸路通行賦
稅並聽收受十一月戊子焚惑與填星順行太陰犯房發粟賑益
都濟南濱棣饑自是凡遇各路州縣及諸王投下
水旱荒饑輒發穀鈔賑糶史不勝書十二月丙申帝至自和

林乙巳以西僧八思巴為帝師授玉印統釋教是歲立太常寺玉

宸院儀鳳司符寶局御酒庫升龍岡新城為開平府以吏戶禮為

左三部兵刑工為右三部各設尚書二員

二年辛酉春正月辛未夜東北赤氣照人大如席庚寅李璫擅發

兵修益都城塹二月丁酉太陰掩昴丙午車駕幸開平詔減民間

差發及軍站戶重科租稅罷守隘軍三月壬戌朔日食夏四月丙

午聽儒士被俘者贖為民乙卯命十路宣撫官勸農桑抑游惰禮

高年問民疾苦舉茂才異等可從政者列名上聞其職官污濫及

民不孝弟者量輕重議罰是月躬祀天子桓州之西北灑馬渾為

禮皇族之外無得與五月乙丑遣崔明道李全義為詳問官詣宋

問國信使所在庚辰諭使臣經過官給餼廩軍士毋輒入民家丁

夷弛諸路山澤禁私殺馬牛越境私販馬者罪死命史天澤為

中書右丞相河南軍民並聽節制置惠民藥局其法官給鈔本口當子錢
備藥物仍擇良醫主之每

局給銀五百錠為規運本至元二十五
年以陷失官本悉罷成宗大德間復置以姚樞為太子太師竇默為太子太傅

許衡為太子太保皆辭不拜六月癸巳諭各路宣聖廟有司歲時

致祭諸儒月朔釋奠諸官員使臣軍馬毋得宿廟及聚飲理訟其

事書院亦如例違者加罪丙申罷諸路招收孛蘭奚括漏籍老幼

等戶協濟編戶賦戊戌太陰犯角庚子定鹽酒稅法每鹽一引價銀七兩乙卯

罷安邑貢蒲萄酒免衛輝懷孟賦稅償其所借芻粟庚申宋安撫

劉整籍瀘州十五郡來降以整為夔路安撫使升真定鼓城縣為

晉州罷金銀銅鐵丹粉錫祿坑冶所役民夫及河南舞陽薑戶藤

花戶還州縣出工局繡女懷孟提舉王允中引沁水鑿渠成溉田

四百六十餘所賜名廣濟渠命耶律鑄為左丞相秋七月辛酉朔

立軍儲都轉運司癸亥立翰林國史院勅修遼金二史以史天澤

耶律鑄為監脩官採訪遺事命宋降將王壽製神臂弓柱子弓教

武衛軍習射諭河南管軍官于近城地量存牧場餘聽民耕乙丑

遣官持香帛祀嶽瀆海鎮及后土凡十有九處分五道每歲代祀自此始辛

巳詔許衡即其家教懷孟生徒制曰咨爾許衡天資雅厚經學精

專諸凡講論之間深得聖賢之奧受罰者恐陳君所短為盜者畏

王烈之知所在嚮風真堪正俗可令于懷孟等處選揀子弟俊秀

者舉歸教育取作範模再令董子惟前有傳授之弟子重使王通

門下皆經濟之名臣母喪斯文以弼予治見河南藝文志已丑命鍊師王道

歸于真定築道觀賜名玉華自後每忌日享唐宗治后御容于玉華宮即此發諸道兵伐宋詔曰

朕卽位之後深以戢兵為念遣使於宋以通和好宋人不務遠圖

伺我小隙反啟邊釁東剽西掠曾無寧日朕今春還宮諸大臣皆

以舉兵南伐為請朕重以兩國生靈之故猶待信使還歸庶有悛

心共成和議留而不至者今又半載矣往來之禮遽絕侵擾之暴

不已曲直之分灼然可見卿等當整爾士卒礪爾戈矛矯爾弓矢

秋高馬肥水陸分道而進大興問罪之師尚賴宗廟社稷之靈其

克有勲毋替朕命八月壬辰賜故金補闕李大節諡貞肅修撰魏

璠諡靖肅戊戌以賽典赤平章政事許衡為國子祭酒姚樞為大

司農竇默仍翰林侍講學士庚子立勸農司以陳邃崔斌等爲使
壬寅頒斗斛權衡丙午太白犯歲星米私商七十五人入宿州有
司議真法帝宥之聽權場貿易九月庚申朔奉遷祖宗神主于聖
安寺藏之瑞像殿戊辰徵儒人楊庸爲教授教孔顏孟三氏子孫
王鏞爲太常少卿教習大樂辛未置和糴所于開平丙子諭諸王
駙馬凡民間詞訟無得私自斷決田租輸沿河近倉官爲轉漕毋
勞民癸未改開元路隸北京免真定官民所貸官錢立諸路提舉
學校官以王萬慶敬鉉等三十人充之冬十月庚寅朔帝自將討
阿里不哥諸王合丹增察兒從命平章趙璧尚書怯烈門各率蒙
古漢軍駐燕京近郊太行一帶東至平灤西控關陝修立堡寨壬
寅命亳州張柔歸德邸浹睢州王文幹水軍鮮成張榮賈東平嚴
忠嗣濟南張宏七萬戶及指揮使鄭江董文炳各率所部兵詣行

在十一月壬戌與阿里不哥遇于昔木土腦兒之地諸王合丹增
 察兒分兵奮擊大破之追北五十里帝親率師躡其後阿里不哥
 北遁庚午太陰犯昴癸酉命怯烈門趙璧率諸軍從塔察兒北上
 分蒙古軍一出居庸關駐宣德德興府一出古北口駐興州帝親
 將諸萬戶漢軍及武衛軍由檀順州駐潮河川以防之罷十路宣
 撫司止留開元路十二月辛卯熒惑犯房壬辰犯鈞鈐甲午帝還
 師詔撤所在戍兵放民間新僉軍壬寅立異樣局達魯花赤掌御
 用織造立宮殿府專職營繕及御衣宮闈尚食尚藥諸局設控鶴
 軍五百四人以軍使領之按唐武后聖歷二年創置控鶴府久視二年改奉宸府控鶴
 之名始此至元二十年以控鶴一百三十五人隸府正司三
十一年增控鶴六十五人立
 衛候司領之兼管東官儀從是歲天下戶一百四十一萬八千四百九十有

九

五年壬戌春正月辛未禁諸道戍兵及勢家縱畜牧犯桑棗禾稼

癸酉以軍興人民勞苦停公私逋負毋徵丙戌命備宮懸鐘磬樂

舞籥翟用樂工三百六十二人二月丁亥朔定中外官俸解醒語云并定朝班

凡執政大臣謂擊天班王堂清署謂煥璧班言官法司謂劍鐔班親王謂瓊枝班功臣將帥謂豹首班外戚謂椒蘭班其餘朝臣謂隨班己丑李璿反以連海

三城獻于宋遂入益都丙申郭守敬造寶山漏成徙至燕京甲辰

詔發兵討李璿一會東平一會濱棣以諸王哈必赤總軍事己酉

王文統坐與李璿通謀伏誅詔諭天下曰人臣無將垂千古之彝

訓國制有定懷二心者必誅何期輔弼之僚迺蓄奸邪之志平章

政事王文統起由下列擢真台司倚任不為不深待遇不為不厚

冀收成効以底丕平詎知李璿之同謀潛使子堯之通耗邇者獲

親書之數幅審其有反狀者累年宜加肆市之誅以著滔天之惡

於戲負國恩而謀大逆死有餘辜處相位而被極刑時或未喻咨

爾有衆所宜知悉壬子李璿據濟南三月己未括木速蠻畏吾兒

也里可溫達失蠻等戶丁爲兵徙宏州錦工繡女子京師壬申命戶部尚書劉肅專理鈔法免北京西京絲銀稅夏四月丙戌朔大軍圍濟南辛卯修河中禹廟賜名建極宮甲辰太白晝見敕諸路管民官勸民開墾種植不得擅興不急之役妨奪農時乙卯詔軍民爲李壇脅從者宥其罪命右丞相史天澤專征五月庚申築環城圍濟南禁軍行所在剽掠蠲濱棣今歲田租之半東平十之三戊辰命大司農姚樞與尚書劉肅共商議中書省事六月乙酉朔割遼河以東隸開元路徙婆婆府屯田軍于鴨綠江西以防海壬寅陝西行省言西京宣德太原匠軍困乏乞僉民往代帝曰軍籍已定豈宜更張可令貧富相資果甚貧者聽休息一歲秋七月戊午復蒙古軍站戶差賦農民包銀徵其半停戶止令輸絲民當供賦之月毋徵私債甲戌李壇就擒磔于市甲申夜有白氣亘天八

月己丑郭守敬請開玉泉水以通漕運王允中請開邢洛二州漕
盜漕河達泉以溉民田並從之甲午以宣德州德興府銀冶付匠
戶歲取銀及石綠丹粉輸官丙午立諸路醫學教授九月戊午以
董文炳兼山東路經畧使收集益都舊軍充武衛軍戍南邊壬戌
改邢州為順德府癸酉命阿木為征南都元帥治兵于汴閏月甲
申朔諸路軍戶他徭發粟三十萬賑濟南冬十月丙寅分東西兩
川都元帥府為二賜高麗國王歷自是每歲皆賜庚午敕總帥汪惟正將戍
青居軍還屯田利州乙亥分立中書左右部以回紇人阿合馬領
之仍兼諸路都轉運使專理財賦丁丑禁畿內畋獵諭質子軍入

侍諸侯將授之子弟充軍者又曰充晉化軍

十一月乙酉太白犯鈎鈐辛丑日有背氣重暈三

珥作佛頂金輪會于聖安寺金籙周天醮于長春宮

自是每歲間作

遷河西

民居應州官給牛種仍賜布人各二匹乙巳史天澤入見帝曰朕

自知性不容物或乘怒欲有誅殺卿宜遲留俟覆奏方行戊申升撫州爲龍興府建行宮十二月甲寅封皇子眞金爲燕王守中書令丙辰立河南山東兩路統軍司自亳州至均州諸萬戶隸河南宿州至海州諸萬戶隸山東丁巳立十路宣慰司以總軍民立諸路轉運司掌權稅癸亥詔各路總管兼萬戶者止理民事勿預軍政其州縣官兼千百戶者仍其舊諸路管民總管子第有分管州府司縣及鷹坊人匠諸務者悉罷之戊寅升太原臨泉縣爲臨州是月卽中書省奉祀祖宗神位備三獻官大禮使司徒攝祀事禮畢神主復藏瑞像殿

四年癸亥春正月丙戌改諸路監權課稅所及清滄深鹽提領所爲轉運司甲午立十路奧魯總管府癸卯從阿合馬請興河南鐵

石設巡禁私鹽軍

續文獻通考云以解州鹽引一萬五千道和中陝西軍諸

以廉希憲爲中書平章政事

姚樞爲左丞商挺參知政事乙巳論諸路漢軍奧魯母隸各萬口
管領其科徵差稅山東河南隸統軍司東西兩川隸征東元帥府
陝西隸行戶部辛亥放濟南所俘民文面爲奴者歸元籍二月壬
子朔詔諸路官員子弟入質車駕幸開平發各衛軍千五百人扈
從諸衛漢軍萬五千人駐山後蒙古軍三千人駐官山防守歲如
制甲子以王德素充國信使致書于宋詰其稽留郝經之故括民
間兵器匿者死三月己亥定諸路包銀准輸鈔其絲料入本色非
產絲之地亦聽折鈔凡當差戶包銀鈔四兩每十戶輸絲十四觔
漏籍老幼鈔絲減三之一癸卯初作太廟于燕京夏四月庚戌朔
以漏籍附籍諸戶一萬六千於各處起冶歲課鐵四百八十萬七
千觔罷開元宣慰司以太祖所行事蹟付史館五月乙酉初立樞
密院以皇子燕王兼判院事戊子升開平爲上都辛卯立平準庫

以均物價通鈔法庚子升開平望雲縣爲雲州松山縣爲松州從
阿合馬請以歲入鐵鑄農具令民易粟輸官六月癸酉建帝堯廟
于平陽賜田十五頃命線真爲右丞相塔察兒爲左丞相秋七月
癸未禁諸投下毋擅勾攝燕京路州縣官吏諸路探馬赤毋擾民
蒙古軍不得以民田爲牧地戊戌弛沿邊軍器禁升燕京安次縣
爲東安州固安縣爲固安州置權塲于樊城與宋通互市八月戊
申朔置元帥府于大理升宣德州爲府隸上都以淄萊登三州爲
總管府治淄州命昔撒昔總制鬼國大理兩路兵部郎中劉芳使
大理至吐番遇害詔恤其家戊午以阿脫商挺行樞密院于成都
順慶潼川元帥府並聽節制甲子以百涼經兵賑之鈔仍免租賦
三年諭諸臣傳旨有疑者許覆奏壬申車駕至自上都九月乙酉
立漕運河渠司禁民間所市布帛疎薄狹短者宋主昀崩子禧嗣

改元咸淳冬十二月丁未朔令益都元帥欽察統鳳翔青居平陽
軍戍虎嘯寨甲戌徵也里可温達失蠻僧道等戶田租商稅是歲
天下戶一百五十七萬九千一百一十定民間絕戶財產並拘入
官毋寡子幼者其母不得私鬻田宅放賤為良富家子弟父兄在

者不得私借錢債典售家產人口違者斷追入官見典章

至元元年甲子春正月丁丑朔高麗國王王補遣使來賀自是每正且皆至

勅諸路宣慰使非奉詔無輒入覲諸王位下工匠已籍為民者並

徵差賦癸卯築冷水河城分兵戍之二月辛亥選儒士編修國史

譯經書起館舍給俸贍之壬子修瓊花島在大內西北萬歲山之陽疏雙塔漕渠丁

卯太陰犯南斗癸酉車駕幸上都以西北諸王款附召諸路總管

赴上都大朝會夏四月戊申以彰德洛磁路引漳滏洹水灌田致

御河淺澁鹽運不通命塞分渠以復水勢辛亥太陰犯軒轅御女

星戊午太白晝見五月乙亥遣郭守敬行視西夏河渠庚辰勅劍

州守將分軍守劍門關立寨人頭山釋宋私商五十七人給糧遣

歸丙戌太陰犯房己亥犯昴以粘合南合平章政事秋七月甲戌

彗星出鬼柳昏見西北光燭天長數十丈貫上台掃紫微文昌北

斗旦見東北凡四十餘日癸未改新鳳州為徽州以西番十八族

部立安西州丁酉龍門禹廟成庚子阿里不哥與親王玉龍蒼失

阿速帶昔里吉等及其謀臣不魯花阿里察脫忽思自歸上都帝

曰諸王皆太祖之裔釋不問惟誅不魯花等三人八月壬寅朔定

京府州縣官放假格天壽立春端陽立秋重陽冬至及七月望十月朔各給一日元昊

日並禁屠宰詔諸縣尹品秩雖小民生休戚繫焉往往任用非人致使恩

澤不能下逮民情不能上通培克侵凌為害非細應選循良廉幹

之人往任斯職專一撫字吾民以五事考課為升殿戶口增田野

開詞訟簡盜賊息賦役均五事備者爲上選升一等四事備者添
一資三事成者爲中選依例遷轉四事不備者減一資五事俱不
與者黜儼乙巳立諸路行中書省以省官出領其事軍國重務無
不統攝詔頒新立條格定官吏員數分品從等秩給俸祿授公田
計日月以考殿最禁擅用官物勿以官物進獻勿借易官錢勿擅
科差役凡軍馬不得停泊村坊詞訟不得隔越陳訴恤孤寡勸農
桑驗旱澇平市價具盜賊囚徒起數月申省部其諸王使臣驛傳
稅賦差發不得擅招民戶不得以銀與非投下人爲幹脫禁口傳
敕旨及追呼省臣官屬庚戌定諸站戶限田四頃免稅以供驛馬
及祗應癸丑賜僧子聰復姓劉易名秉忠拜太保參領中書省事
始定都于燕改燕京爲中都分立省部其大興府仍舊丁巳改元
大赦詔曰應天者惟以至誠拯民者莫如實惠朕以非德獲承慶

基內難未戢外兵未戢夫豈一日于今五年賴天地之異矜暨祖
宗之垂裕凡我同氣會于上都雖此日之小康敢朕心之少肆比
者星芒示儆雨澤愆常皆闕政之所由顧斯民其何罪宣布惟新

之令溥施在宥之仁可大赦天下改中統五年為至元元年於戲

否往泰來迺續亨嘉之會鼎新革故正資輔弼之良咨爾臣民體

朕至意戊午彗星消伏甲子復見于參車駕至自上都自是二月臨幸八月始還元世

諸帝率循無異皆不書冬十月庚戌有事于太廟奉安祖宗神主戊辰改武衛

軍為侍衛親軍分左右翼典章云定諸盜罪不至死者均刺斷充營跡人十一月辛巳吉里迷國

內附言東有骨鬼亦里干兩部歲來侵疆詔發兵征骨鬼壬辰罷

領中書左右部并入中書省仍以阿合馬平章政事兼諸路都轉

運使知太府監事十二月乙巳定中外官儀從甲子太陰犯房詔

采人新附及北人陷沒來歸者皆月給衣糧庚午罷各路奧魯官

並各授下達魯花赤始立州郡長吏遷轉法五品以上宣授十品
以下敕授是歲招集析居放良還俗僧道編集人戶名怯憐口習
諸色匠藝設總管府領之

二年乙丑春正月辛未朔日食癸酉徙鎮海百里八謙謙州諸色
匠戶于中都給銀萬五千兩爲行費又徙奴懷忒木帶兒礮手人
匠赴中都造船運糶乙酉籍河南北荒田分給蒙古軍耕種庚寅
城西番匣答路癸巳八東乞兒部牙西來朝貢銀鼠皮二月辛丑
朔併六部爲四以麥朮丁爲吏禮部尚書馬亨爲戶部尚書巖忠
範爲兵刑部尚書別魯丁爲工部尚書禁山東諸路私煎硝鹽甲
子定蒙古人充各路達魯花赤漢人充總管回鶻人充同知永如

制 典章云凡文案一同判行印信
聽達魯花赤封識長官收掌

廉希憲商挺罷以寶合丁王晉代之諭僧

人通五大部經者爲中選以有德業者爲州郡僧錄判正副都綱

等官仍于各路設三學講三禪會三月乙未罷南北互市括民間

南貨官給其直骨嵬襲擊吉里迷部兵帝命出粟及弓甲給之免

權上都商稅酒醋諸課夏閏五月癸卯升修縣為景州罷淘金總

管府聽民採辦丁卯定四親王南京分地鄭州隸合丹鈞州隸明

至睢州隸寧羅亦蔡州隸海都其他屬邑復還朝廷命趙璧行省

南京廉希憲行省東平姚樞行省西京詔各路州府戶不滿千者

量加併省凡投下者各附所隸州城其散府州郡戶少者不更設

錄事司及司候司附郭縣止聽州府官兼領自是裁併州縣凡二百二十餘所六月戊

辰朔新得州土官向良內附令移戍通江徙山東統軍司于沂州

丙子太陰犯心大星秋八月己卯諸省臣皆罷命安童為右丞相

伯顏為左丞相阿木帥師攻廬州安慶諸路宋將范勝張林高興

益興戰死九月戊戌將有事于太廟命滌養犧牲取大樂工于東

平預習儀禮庚子皇孫鐵穆耳生冬十月己卯享太廟尊皇祖爲太祖追諡聖武皇帝皇祖妣爲光獻皇后癸未勅統軍萬戶麾下所俘人口官贖爲民其私越禁界被獲者許親屬完聚詔貧難軍或兩戶三戶合出正軍一名其丁單有力者許募人應役十二月庚午改北京西夏二行省爲宣慰司己丑瀆山大玉海成置廣寒殿改諡皇考睿宗爲景襄皇帝上皇妃尊諡爲莊聖皇后升祔睿宗廟置宗王府扎魯忽赤十員掌諸王駙馬投下蒙古色目人應犯一切公事及漢人姦盜等罪

三年丙寅春正月壬子立制國用司以阿合馬爲使張惠副之張易同知司事二月丙寅復以廉希憲平章政事張文謙爲左丞阿里爲右丞史天澤爲樞密副使甲申製太常禮樂工冠服復立東京廣寧懿州開元恤品合懶摩娑等路宣撫司參知政事王晉侍

中和誓斯轉運使王明坐隱匿鹽課伏誅夏四月丁卯五山珍御

楊成置瓊華島庚午定歲祀嶽鎮海瀆之制正月東嶽鎮海瀆土王日祀泰山于泰安州沂山于益都府立

春日祀東海于萊州大淮于唐州三月南嶽鎮海瀆立夏日遙祭衡山土王日遙祭會稽山皆在河南府界立夏日遙祭南海大江于萊州界六月中嶽鎮土王日祀嵩山于河南府霍山于平陽府七月西嶽鎮海瀆土王日祀華山于華州吳山于隴縣立秋日遙祭西海大河于河中府界十月北嶽鎮海瀆土王日祀恒山于曲陽縣醫巫閭于遼陽廣寧路立冬日遙祭北海于登州濟瀆于濟源縣

既有江南五月丙午浚西夏中興漢延唐來等渠丙辰罷益都行省

乃罷遙祭及息州安撫司六月丁卯封皇子南木合為北平王戊寅申嚴陝

西河南竹禁初二處皆有繫官竹園每歲以時砍伐易之民間至是始造竹引凡發賣皆給以引秋七月丙申以張德輝

參議中書省事己未發西夏避亂民還本籍成都新民為豪家所

庇者勒歸州縣追尊始祖也速該為烈祖神元皇帝妣月倫為宣

懿皇后遣使諸路慮囚冬十月庚申朔降德興府為奉聖州徙平

陽籍所于京師改名宏文院丁丑太廟成定為八室奉安神主

于祔室烈祖暨懿宣后第一室太祖暨光獻后第二室太宗暨昭

宗暨睿后第三室高宗暨景宣后第四室世宗暨宣惠后第五室

慈后第三室皇伯考术赤伯妣別土出迷失第四室皇伯考察合
台伯妣也速倫第五室皇考睿宗皇妣莊聖皇后第六室定宗及
欽淑后第七室憲宗及貞節后第八室歲用冬祀十一月辛卯詔
給京府州司縣官吏俸及職田典章云凡上任不過初二日罷任已過初五日者
並給本月俸錢其本處官地及斷沒絕戶并冒占
荒閒地內分給職田
各官相沿交收子粒命忽都答兒爲中書左丞相丙辰諭四川行院江
漢庸蜀等效順其官吏對階改授有功者遷有才者用民無生業
者賑衣糧願遷內地者給田廬毋令失所十二月辛酉改四川行
院爲行中書省立諸路洞冶所聽制國用司節制丁亥建大安閣
于上都鑿金口道蘆溝水轉漕西山木石命張柔段天祐同行工
部事築宮城立提點宮城所

四年丁卯春正月癸卯修曲阜宣聖廟乙巳百濟遣使來朝禁僧
官侵理民訟辛亥以趙璧爲樞密副使許衡謝病還懷孟癸丑封

昔木土山為武定山其神曰武定公泉為靈淵其神曰靈淵侯以

討阿里不哥駐此僉蒙古軍戶二三丁者一人四五丁者二人六七丁者三

人為軍戊午析上都龍興府白為一路三月己丑耶律鑄復為左

丞相是年置丞相五員辛卯自潼關至蘄縣立河渡官八員譏察姦偽乙未

建習樂堂于中都使樂工肄業壬寅從安童言止設丞相二員蒙

古漢人參用外用老成一二員同議省事丁巳耶律鑄置宮縣樂

成賜名大成樂夏四月甲子新築宮城于中都東北方六十里為

門十二輟耕錄云萬歲山在大內西北太液池之陽金人名瓊花島其山皆以玲瓏石壘疊秀

有石刻蟠龍昂首噴水仰出然後東西流入太液池山上有廣寒殿七間仁智殿則在山半山前

在焉每歲巡上都先宴百官于此相傳漠北有一山形勢雄偉金人望氣者謂此山有王氣謀厭

勝之乃求通好既而曰他無所異願得某山以鎮壓我士眾許之金人乃大發卒鑿掘壅運至幽

州城北積累成山因開挑海子營構宮殿為遊幸之所未五月丁亥朔日食新建孔

于廟于上都丙申威州山後大番弄麻等十一族來附壬子增諸

路包銀一兩充官俸六月乙丑史天澤復為左丞相忽都答兒
 律鑄並降平章政事伯顏降右丞廉希憲降左丞阿里張文謙並
 降參知政事詔亦即納新附貧民從人借貸者官為代償秋八月
 庚申填星犯天樽丙寅以宣徽院掌供玉食宴享及孳畜芻菽等
 事用人得自選不由中書壬午太白犯軒轅大星九月壬辰作玉
 殿于廣寒殿中乙未勅汪良臣立寨于毋章德山控扼江南以當
 釣魚山之衝戊申復召許衡為祭酒庚戌封皇子忽哥赤為雲南
 王往鎮大理帝曰朕固樂其風土曩非歷數在躬當於彼分器焉
 乃析其國三十六部為三路冬十月壬戌魚通崑州番部入附以
 渠長阿奴版的哥為喝吾等處總管改給鐵旗城後番官鹽書符
 命甲子歲星犯軒轅大星庚辰定官員廕叙格

正從一二品子正七品叙
正三品子從七品叙從三

品子正八品叙正四品子從八品叙從四品子正九品叙正從五品子從九品叙無論官員去任
致仕身故其嫡長子年二十五以上俱聽承廕若嫡長子有廢疾立嫡長子之子孫如無立嫡長

子同母弟如無立繼室所生如無立妾婢子如絕嗣旁廕其親兄弟各及子孫如無則旁廕伯叔及其子孫諸用廕者並降子曾孫降孫婢生子及旁廕者皆視合叙品從降一等

月乙酉享太廟宮縣登歌樂文武二舞咸備戊戌立新蔡益津二

縣甲辰立夔府路總帥府戊開州乙巳瑱星犯天罇距星十二月

己卯省平陽路岳陽和川二縣入冀氏安西路櫟陽縣入臨潼立

諸位幹脫總管府

五年戊辰春正月甲午太陰犯井定職官之任遠限及病假滿百

日者並作闕其親老告侍者如之暮年後仍聽起用見典章閏月戊

午令益都漏籍戶四千淘金棲霞縣每戶歲輸金四錢二月戊子

太陰犯天關己丑犯井三月丙寅免諸路四品以下官子孫入質

壬申改母章德山為定遠城武羣山為武勝軍丁丑罷諸路女真

契丹漢人為達魯花赤者夏五月辛亥朔以太醫院拱衛司教坊

司及尚食尚果尚醞三局隸宣徽院秋七月癸丑初立御史臺命

右丞相塔察兒為御史大夫帖只為御史中丞帝曰臺官職在直

言朕或有未當其極言無隱毋憚他人朕當爾主殿耕錄云初置御史臺秩從二品至元七年升

正二品大德十一年升從二品臺有大夫一人後增一人中丞二人後增二人復設侍御史二人治

書侍御史二人殿中侍御史二人監察御史十二人後增至十六人皆漢人後又增蒙古色目人如

漢人數內監察御史署無御史臺三字以為天子耳目之官非御史大夫以下可制也行臺則不然凡公文所書臺字並從上從口若作其字頭則偽文也戊辰罷諸路

打捕鷹坊工匠洞冶總管府並聽轉運司兼領遣忙古帶率兵征

建都蠻九月癸丑罷中都路和雇所立京師瀕河十倉丁巳阿朮

統兵圍樊城冬十月戊寅朔日食己卯敕中書省樞密院凡事與

御史臺同奏初設起居注以翰林官兼充十二月戊寅敕二分二

至及聖誕節祭屋于司天臺復置乾州奉天縣以好時永壽二縣

省八是歲帝擊叛王海都于北庭追至阿力麻里之地去上都萬

餘里海都遠遁帝令勿追典云禁由毒藥如附子烏頭巴豆砒霜之類及不通醫

割肝刺眼

以行孝者

六年己巳春正月癸丑立四道提刑按察使司設副使僉事巡行

各道曰山東東西道河東陝西道山北東西道河北河南道任滿

聽御史臺考核典章云以一道領諸知大體所察得實民無冤獄者為稱職戊午命史天澤董師襄陽二

月己丑頒蒙古新字詔曰國家肇基朔方制用文字皆取漢楷及

畏吾字以達本朝之言考諸遼金及遐方諸國例各有字今文治

寢興字書方缺特命國師八思巴創蒙古新字頒行諸路譯寫一

切文書期于順言達意而止凡璽書頒降俱用新字仍各以其國

字副之丁酉敕宮燭母彩繪鞍靴箭鏃不得以黃金為飾夏四月

辛巳製玉璽大小十紐放傘丁貧乏軍為民禁戍卒毋踐屯田禾

稼以真定等路蝗免代輸築城夫戶賦癸卯命董文炳率兵南征

秋七月辛酉製太常寺祭服己巳立諸路蒙古字學設教授命職

官子弟每路二人府州各一人民間子弟上路三十八下路二十

五人充生徒典章云凡省院臺部並用識家古字人員作必關赤譯寫文移立西蜀四川監權茶場司通攷云用運司

白賡言權成都茶于京兆華昌置局發賣私自採賣者與私鹽同罪八月己卯立金州招討司丙申命中書省

采輯農桑事定列條目令按察使與州縣官相風土所宜頒行九

月招諭淮蜀官民詔曰朕纂承丕基同仁一視罔間南北兩淮四

川大江以南皆吾赤子即位之始未遑他務首遣國信使副講信

修睦以通和好惟期投戈卷甲使兩地百姓息肩咸遂安生樂業

之願豈意宋人妄生邊釁是驅若國生靈置之鋒鏑而不恤也恐

有無辜枉被殘擾今詔諭彼界官吏軍民人等及我國人或因小

過逋亡或勢不獲已因而陷沒者當明知朕不欲用兵之本意爾

等即轉禍為福其審圖之見大方通鑑戊午定民間貸錢雖踰限止償一

本息冬十月己卯定朝儀服色壬午升高唐寇氏並為州庚子太

陰犯辰星遣官慮囚敕諸路鰥寡廢疾人官給廬舍薪米後皆十不書

二月戊子築東安渾河堤己丑時享畢命國師作佛事于太廟七

晝夜造木質金表牌位十六設大榭金椅奉安祔室前此太廟薦佛事之始析

彰德懷孟衛輝為三路升林慮縣為林州改楨州為韓城縣併省

馮翊等州縣十所始置義倉其法每社置倉令社長主之豐年每丁給米五斗歉歲就給社民

七年庚午春正月丙午耶律鑄廉希憲罷立尚書省罷制國用使

司以忽都答兒為中書左丞相許衡為左丞阿合馬平章尚書省

事張易副之張惠李堯咨麥朮丁並參知尚書省事己酉太陰犯

畢改諸投下官隸中書省初制以中書省統山東西河北地謂之腹裏為路二十有九大都燕京皆隸焉謂之都省此外重地則置行中書省

至是以諸王駙馬投下者併隸都省二月辛未朔以伯顏為樞密副使甲戌築昭應宮于

高梁河丙子帝御行宮觀劉秉忠許衡及太常卿徐世隆所起朝

儀大悅舉酒賜之丁丑以歲饑罷築宮城壬辰立司農司以張文

謙為卿設四道巡行勸農官典章云兼管水利舉祭勤惰仍委所在親民長官當為提點

農年終通考農事成否類司農司任滿視此為殿最

三月庚子朔日食改諸路行中書省爲行尚書省丙辰浚武縣御
河夏四月壬午檀州隕黑霜二夕定諸路達魯花赤子弟蔭叙充
散府諸州達魯花赤其散府諸州子弟充諸縣達魯花赤諸縣子
弟充巡檢癸未定軍官品級萬戶總管千戶百戶總把以軍士爲
差始給軍官俸己丑省終南縣入整屋復置眞定路贊皇縣太原
路樂平縣平灤路撫寧縣五月甲辰威州汝鳳川番族渠長來朝
以合答平章政事丙辰免上都商稅惟市易莊宅奴婢孳畜例收
契本工墨之費六月庚辰敕戍軍還沿途立安樂堂饑者食之病
者醫之死者藁葬官給其直丙申立籍田于中都東南郊秋七月
辛丑設上林署乙丑以遼東開元總管府兼本路轉運司事八月
戊辰朔阿朮築環城以逼襄陽戊寅以塏察兒同知樞密院事帖
只爲御史大夫辛巳置應昌府設官屬

在上都東北三白里答兒海子係駙馬幹
羅陳分地至是初建城邑以居賜名應昌

九月庚子汰僧道有家室者爲民丁巳太陰犯井丙寅括河西戶
口定田稅冬十月庚午太白犯右執法癸酉定宗廟祝文書蒙古
字牲牢用野豕時果勿市取之內園降輿中府爲州十一月壬寅
熒惑犯太微西垣上將立侍儀司掌朝會諸儀史天澤築萬山爲
一字城自是褻樊道絕閏月丁卯朔禁繪毘織日月龍虎及以龍
犀飾馬鞍者壬辰立諸站都統領司總驛傳仍設脫脫禾孫盤詰
往來奸僞十二月丙申朔改立大司農司增巡行勸農使副各四
員命御史中丞李羅兼大司農卿以都水監隸之定歲祀制每春
秋二仲月上戊日祭大社大稷于西南郊立春後丑日祭風師于
東北郊立夏後申日祭雨師雷師于西南郊凡天子親遣使致祭者三曰社稷曰先農曰宣聖具嶽鎮海瀆
則使者奉壘書卽其處行禮稱代祀而有司常祀壬寅降河南韶州爲澠池縣丁
之五日宣聖曰三皇曰嶽鎮海瀆曰風師雨師

未金齒驃國三部長內附獻馴豕三辛酉建大護國仁王寺于高

良河更定僧尼服色是歲東京路旱南京河南等路蝗免絲銀十之三賑山東淄萊路饑者再

八年辛未春正月丙寅太陰犯畢巳卯諭南陽屯田人戶皆內地

中產之民遠徙失業各仍還本籍南京諸郡民賦悉改輸米粟貯

近地給襄陽軍遣兀都蠻師師鎮西方當當一作當發近畿民二萬

八千人築宮城二月乙未朔定官民婚聘禮數一二品者五百貫三品者巳亥罷諸路轉運司

入總管府移陝蜀行省于興元癸卯以趙璧為中書右丞乙巳大

理宣慰寶合丁王傳濶濶帶毒殺雲南王忽哥赤事覺伏誅戊申

以治事日程論中外官吏巳未敕軍官佩金銀符其民官工匠所

佩者並拘入勿復給辛酉分歸德為散府升中州為南陽府濟州

為濟寧府三月乙丑增置河東山西道提刑按察司改河東陝西

三百貫六七品者二百貫八九品者一百二十貫賤人上戶一百貫中戶五十貫下戶二十貫其差異職官不過四味庶人不過三味貴賤有差

道爲陝西四川道山北東西道爲山北遼東道辛巳復立夏邑縣以碭山併入省穀熟縣入睢陽乙酉許衡以老病乞解機務除集賢大學士兼祭酒如故設蒙古國子學選蒙古漢人官員子孫及俊秀者充生徒好學者兼習算法丁亥熒惑犯太微西垣上將已丑敕有司毋滯獄以致越訴封皇子燕王乳母趙氏幽國夫人夫鞏德祿追封德育公夏四月壬寅撫寧縣民生子中夜有光詔善加鞠養左右或疑之帝曰世間何幸生一好人母啟嫉心也戊午阿木與宋將范文虎戰于湍灘敗之生擒百餘人五月乙丑以東道兵方圍襄陽分命秦蜀諸將各進兵鄭鼎出嘉定汪良臣出重慶札刺不花出瀘州曲立吉思出汝州以牽制宋師所至順流縱棧獲宋戰艦甚衆丙寅牢魚國來貢己卯命史天澤平章軍國重事六月甲午諭樞密院凡軍情徑奏不由尚書省有事關錢糧者

仍與共議管民官所領錢穀並俟年終考較乙卯招集河西幹端
昂吉呵等處官民秋七月壬戌朔設回鶻司天臺官屬丁卯命國
王頭輦哥行省北京有訴運山侍郎張大悅與宋交通者帝諭之
曰宋人善用間計朕不輕信毋懷疑懼辛未置左右中三衛親軍
都指揮使司掌宿衛扈從兼屯田事八月壬辰朔日食己未聖誕
節始立內外仗及雲和署樂位東川統軍司攻拔銅欽寨宋總管
李慶降以慶知梁山軍九月丙寅罷陝西五路西蜀四川行省以
也速答兒行四川省事于興元京兆等路直隸尚書省戊辰升成
都德陽縣爲德州降虢州爲虢畧縣丙子太陰犯畢敕今歲享太
廟毋用犧牛癸未弛四川茶鹽禁帝曰四川民力困敝自今有言
茶鹽之利者以違制論冬十一月辛酉朔令品官子孫三品以下
七品以上年二十五上者當曝直一年後分別敘用乙亥定元正

朝會聖節詔赦及百官宣敕具公服迎拜丙子禁用金泰和律建
國號大元詔曰誕膺景命奄四海以宅尊必有美名紹百王而紀
統唐之爲言蕩也堯以之而著聲虞之爲言樂也舜因之以作號
馴至禹興而湯造互名夏大以殷中世降以還事殊非古雖乘時
而有國不以義而制稱爲秦爲漢者止從初起之地名曰隋曰唐
者僅乃始封之爵邑是皆徇百姓見聞之狃習要一時經制之權
宜槩以至公不無少貶我太祖握乾符而起朔土以神武而爭帝
圖肆震天聲大恢土宇方輿之廣歷古所無頃者耆宿詣庭奏章
申請謂旣成於大業宜早定以鴻名在古制以當然于朕心乎何
有可建國號曰大元蓋取易經乾元之義茲大治流形于庶品孰
名資始之功予一人底寧于萬邦尤切體仁之要事從因革道協
天人於戲稱義而名固匪爲之溢美孚休惟永尚不負于投艱嘉

與敷天其隆大號

按元建國曰大元取大哉乾元之義建元曰至元取至哉坤元之義敷

乾坤二卦之辭

十一月辛卯朔宣徽院請以闕遺漏籍等戶淘金帝曰姑止

母重苦吾民也乙巳立新字學士于國史院掌翻譯文字省太常

寺入翰林院宮殿府入少府監

九年壬申春正月甲子罷尚書省入中書省以阿合馬張易並平

章政事張惠為左丞李堯咨麥木丁並參知政事罷給事中中書

舍人檢正等官仍設左右司丁丑命西平王奧魯赤領忙古帶十

八族欲速公弄等上番軍同征建都蠻降新安州為縣隸順天改

諸路行尚書省仍為行中書省分立京兆行省壬午改山東東路

總軍司為行樞密院移鳳州屯田于鹽白三州二月辛卯詔札魯

忽赤乃太祖開國所制位列百司上其賜銀印立左右司

自後多稱也可札魯

忽赤也可音猶言天子自領也

改中都為大都庚子復置唐州祕陽縣戊申始祭先農

于東郊如祭社儀三月甲戌焚民間四教經免醫戶差徭阿朮破
樊城外郭夏五月戊午朔立和林轉運司兼提舉交鈔癸亥遣拔
都軍于怯鹿難之地開渠耕田罷西番禿魯于諸處金銀礦戶爲
民乙酉太白犯畢距星建宮城東西華左右掖門六月壬辰減乞
里吉思屯田租宋師救襄陽阿朮敗之龍尾洲宋統制張順張貴
死之京師大雨壞牆屋壓死者衆禁私鬻回鶻歷秋八月丙戌朔
日食戊子立羣牧所掌天閑及尚方鞍勒丁未降延州爲延津縣
與陽武同隸南京九月定祀典神農高辛以上聖帝明王及三代
開國主所在官司三年一祭微子張良以上忠臣義士所在人民
歲時致祭見典章丙寅括諸路正軍貼戶及同籍親戚奴僕丁年旣
長依權要避役者並還爲軍戊寅太陰犯御女冬十月丙戌朔封
皇子忙兀刺爲安西王賜京兆分地駐兵六盤山遣使持詔諭扮

上忻都國戊戌以趙璧平章政事張易為樞密副使熒惑犯填星
已亥定每歲自七月至十一月終聽捕獵餘月有禁癸卯立會同
館以居降人及番峒官之來朝貢者百官志稱至元十三年始置今據紀文載此十一月壬戌

諸王只必帖木兒築新城成賜名永昌府丁卯太陰犯畢已卯併
中書省左右司為一回鶻獻巨石礮命送襄陽軍前十二月乙酉

朔宋將咎萬壽攻成都僉省嚴忠範戰失利逮至京癸丑升拱衛
司為拱衛直都指揮使司千戶所為大都路兵馬司掌京城捕盜

事通考云驗都邑民衆寡置馬坊弓手夜巡邏禁人出入京師南北兩兵馬司各至千人每百戶取中產者一人充資發官有綱運若流徙者至則執兵仗導從以轉授受外此則不敢役示專

其捕盜職

十年癸酉春正月戊午立京師醫學名廣惠司癸亥阿里海牙取
樊城宋將張漢英范天順牛富死之丁卯立秘書監掌歷代圖籍
并陰陽禁書選世家名臣子弟為監丞已卯置軍器永盈二庫分

典弓矢甲冑遣使持金十萬兩市藥獅子國

典章云定秀才學宮
執事用欄帶唐巾

二月

丙申雲南羅羽渠長阿旭叛敕有司安集其民丁未宋安撫呂文

煥以襄陽降召赴闕其熟券軍留襄陽屯田生券軍分隸各萬

翼三月丙寅帝御廣寒殿詔曰自古帝王之治天下也莫不立后

以正家建儲以定國朕自纘承大統卽命皇后宏吉刺氏正位中

宮仰惟太祖之遺訓俯協諸王之僉言乃立嫡蒙燕王真金爲皇

太子積有日矣比者朝臣懇奏冊寶之禮宜卽舉行巳于三月日

授皇后以玉冊玉寶授皇太子以玉冊金寶從典禮也咨爾臣民

各宜知悉

見典章

壬申分金齒國爲兩路癸酉客星青白如粉絮起

畢度五車北復自文昌貫斗杓歷梗河至左攝提凡二十一日命

耶律鑄平章軍國重事張惠爲右丞夏四月癸未朔呂文煥入朝

授侍衛親軍都指揮使襄漢大都督罷中興河南兩路行省命史

天澤阿水阿卑海牙行荆湖樞密院事鎮襄陽合答劉整塔出董
文炳行淮西樞密院事守正陽爲滅宋計丁酉救南儒被人畧賣
者官贖爲民辛丑罷四川行省入西川行院別置東川行院于重
慶五月壬子朔詔天下獄囚除殺人者待報其餘槩行疎放限八
月內如期自至大都六月丁亥免大都南京兩路賦役以紓民力
汰陝西貧難軍甲午改資用庫爲利用監閏月己巳罷東西兩川
統軍司秋七月辛巳許衡乞罷丙戌敕襄陽生券軍無妻子者赴
京老疾者遣還家庚寅省西涼府入永昌路是月霖雨享祭山川
嶽鎮海濱社稷宗廟八月庚戌朔高麗遣使賀聖誕節後每歲皆至赦諸
路罪囚自至大都就獄者二十二人九月辛巳以合伯平章政事
甲申生券軍至大都詔釋其械俾從征曰本人各賜鈔娶妻丙戌
以王恂主國學增置生員設東宮宮師府詹事以次官屬己丑敕

自今秋獵鹿不先薦太廟冬十月庚申命合答帶爲御史大夫出
御史臺贓罰鈔賑貧民升襄陽府爲路初建正殿寢殿香閣周廡
兩翼室皇子奧魯赤攻建都擒其長下濟等四人建都降立寧遠
都護府大司農言畿內秋禾始收請禁民覆耕恐妨芻牧帝以農
事有益不許十二月己酉朔省陝州虢畧朱陽三縣入靈寶罷西
夏世官是歲諸路蟲蝻災霖雨害稼賑米凡五十四萬五千五百
九十石免民代輸僉軍絲銀及伐木夫戶稅負前朝官錢毋徵
十一年甲戌春正月己卯朔宮闕告成帝始御正殿受朝賀庚寅
初立軍官以功升散官格自龍虎上將軍以下至進義副尉凡三
十四階丙午免于闡采玉工差役阿里海牙阿朮入覲力言江南
可下宋室可平帝命史天澤伯顏專征僉軍十萬人益之二月戊
申朔立儀鸞局掌宮門管鑰供帳燈燭甲寅太陰犯井壬申起廉

希憲為北京行省右丞三月庚寅移四川礪門兵戍哈答城辛卯
改荆湖淮西二行院為行省伯顏史天澤並為左丞相阿木平章
政事阿里海牙為右丞呂文煥參知政事行省荆湖合答為左丞
相劉整為左丞塔出董文炳參知政事行省淮西癸巳改金州招
討司為萬戶府遣使招諭八魯國夏四月辛亥分陝西隴右諸州

置提刑按察司治鞏昌癸丑初建東宮李氏藏書并草木子云帝思創業艱難移沙漠草於丹墀示子孫無忘草地

謂之誓辛未詔安慰韓端鴉兒看合失合兒等城諭丞相合答先守

沿江堡隘為使傳往來之衛仍分兵掠荆南鴉山以綴宋之西兵

六月庚申聲罪伐宋詔統軍官曰爰自太祖以來彼宋與我使介

交通殆非一日彼此曲直之情亦所共知不必歷舉迨我憲宗御

世朕以藩服奉命南伐師次鄂渚彼賈似道再遣宋京詣軍前請

罷兵息民願奉歲幣朕以國之大事宗親在上必須入計用報而

還卽位之始追憶是言乃命郝經等持書往聘蓋爲生靈計也古者兵交使在其間惟和與戰宜嗣報音其何與於使哉而乃執之卒不復命羈此一介行李於彼何益於此何損以致師出連年邊境之間死傷相籍繫累相屬皆來自禍其民耳襄陽被圍五年旅拒王師義當不貸朕先有成命果能出降許以不死是以旣降之後朕不食言悉全其命奚宋悔過或啟令圖爾乃迷執罔有悛心此問罪之師有不能已者夫以天下爲念爰及于戈自古有之無辜之民初無與焉若彼界官民有能去逆效順與衆來降或別立功績者駭等第官資遷賞所附軍民爾等宜嚴敕將士毋得妄行殺掠仍加賑給令得存濟其或負固弗從及抗拒迎敵者俘戮何

疑

輟耕錄載世祖下江南傲賈似道之罪其文曰宅中圖大天開一統之期自北而南雷動六師

之衆堪嗟殘宋信任非人若賈似道者處之師相之尊委以國柄之重世濟其惡真兇悖之賈

尤謀及過心效姦維之曹操不學無識弄權誇許黃僮免其身比河清莫大之禍承君之寵如彼其專貪天之功確乎不拔惜哉

而物價益湧籜鬪狠者伴食于廟堂任反側者喪師于邊徼恬視雷星之召異罔聞水旱之降災滿朝皆其私人命將悉由重賂用白劄而破世守之法曲丹筆而容天討之刑民心已離而不知天命將革而未悟方且貪湖山之樂聚寶玉之珍弗顧母死奪制以貪榮乃乘君寵立幼而固位以已峻功頌德且自比于周公欺人寡婦孤兒反不如乎石勒深懷禍慝自肆奸邪合正兩觀之誅可紓百姓之怒我大元皇帝聰明知睿神武仁慈焚香祝天誓莫殺而混海宇振兵畧地隨所向以布皇威一戰乘勝而渡江諸將列降而獻土厥角稽首迎我前矛後寶先聲易如破竹昭天順人信之助成風行草偃之功合宇宙以清靈蘇甲子分遣忙古帶帥武衛軍南人民于湯火恩寬幼主以下罪止元惡之身謹檄

征秋七月乙未伯顏陛辭帝曰古之善取江南者惟曹彬一人汝能不殺是吾曹彬也宋主禛崩皇子焜嗣改元德祐八月丁未從史天澤言以荆湖淮西各置行省事權難一復改淮西行省爲行樞密院天澤至中途有疾而還詔太原新僉軍遠戍兩川遣使分括廩粟給其家九月癸巳太軍次鹽山距郢州二十里宋兵當郢夾漢城萬勝堡南岸戰艦千艘鐵絙橫江遏我舟帥不得下惟黃家灣有溪經鷓子山入唐港可達江宋又築壩置堡其處駐兵固守伯顏督諸軍攻拔其堡鑿壩挽舟入溪出唐港整列而進冬十

月壬戌歲星犯壘壁陣乙丑伯顏督諸將破沙洋堡進次新城宋
統制黃順縋城降都統邊居誼自焚死趙文義戰死十一月乙酉
師次復州宋安撫翟貴降癸巳東川元帥楊文安拔宋雲安羅拱
高陽城堡壬寅起閣南直大殿及東西殿增選樂工八百人隸教
坊十二月丙午軍次漢口宋軍守陽羅堡以扼中流伯顏用千戶
馬福計自漢口開壩引船會輪河趨沙蕪徑入大江乙卯阿里海
牙進軍青山磯破武磯堡己未伯顏次鄂州宋權守張晏然都統
程鵬飛知漢陽軍王儀知德安府來興國並以城降伯顏留阿里
海牙鎮鄂州規取荆湖而自與阿朮將大軍水陸東下癸亥增置
歸德永城縣省長武縣入涇川良原縣入靈臺是歲諸路蚩蚘等
蟲災賑米粟凡十二萬餘石天下戶一百九十六萬七千八百九

十二年乙亥春正月甲戌師次黃州宋制置陳奕及其子知漣州
巖皆以州降乙亥東川副元帥張德潤拔禮義城宋安撫張資死
之癸未師次蘄州宋安撫管景模獻城丙戌次江州宋知江州錢
真孫呂師夔知南康軍葉闡六安軍曹明並迎降己丑選蒙古漢
人有才者赴軍前爲新附州郡民官乙未遣尚書廉希賢侍郎巖
忠範秘書監柴紫芝至宋己亥置雲南郡縣長及規措所二月癸
卯師次安慶宋知府事范文虎出降甲辰命博魯歡爲淮南都元
帥會各部兵于邳州立后土祠于臨汾伏羲女媧舜湯河濱等廟
于河中解州洪洞趙城丙午大軍次池州宋統制張林以城降權
州事趙卯發死之丁未禁無籍自効軍俘掠新附軍民戊申詔諭
江黃鄂岳漢陽安慶諸處歸附士民軍匠僧道人等令農者就耒
商者就途士庶緇黃各安已業如鎮守官吏妄有騷擾許詣行省

陳告庚申召降臣張寔然赴闕帝曰朕省卿奏云宋之權臣不踐舊約拘留使者實非宋主之罪儻蒙聖慈止罪擅命之臣庶令趙氏有祀卿言良是卿旣不忘舊主必能輔弼我朝比令伯顏按兵不動仍遣廉希賢等持書往使果能悔過來附旣往之愆朕復何究卽權臣賈似道尚不欲加罪况肯令趙氏乏祀乎若其執迷罔悛未然之事朕將何言天其鑒之辛酉師次丁家洲宋相賈似道親督步帥孫虎臣淮西制置夏貴操戰艦橫亘江中伯顏分步騎夾岸而進舉巨礮擊之宋兵大潰似道走揚州甲子師次蕪湖宋知無爲軍劉權知太平州孟之縉降博魯歡軍下邳宋西海州安撫丁順降乙丑阿里海牙取江陵下岳州宋統制孟之紹舉城降戊辰師次采石知和州王善宋史作喜降博魯歡次漣州宋知州孫嗣武降庚午師次建康宋都統徐王榮翁福茅世雄曹旺俱以城降

賈似道至揚州始送郝經劉人傑歸國命北平王南木合出鎮阿力麻里之地丞相安童行省院事往輔之以防海都三月壬申朔宋鎮江統制石祖忠江陰軍僉判李世修相繼納款乙亥分兵徇饒州宋知州唐震故相江萬里死之敕安西王忙兀刺分軍從西平王奧魯赤征吐番丙子廉希賢等至建康傳旨令諸將各守營壘無妄侵掠已卯升平陰縣新鎮寨爲肥城縣庚辰宋知寧國府顏紹卿知滁州王文虎以城降江東平得府二州五軍二縣四十三甲申置懷遠靈武二縣于中興路分處新民丙戌師至常州宋鈐轄戴之泰通判王虎臣以城降廉希賢等至獨松關爲宋人所殺丙申四川側布番官稅昔確州番官莊寮等率四十三族詣行院款附庚子分置翰林院專掌蒙古文字其翰林兼國史院職修國史典制誥備顧問辛丑命阿朮分兵取揚州

玉堂綱鑑云有二星關于中天一星隕

夏

四月壬寅朔改西夏中興道按察司爲隴右河西道丙午阿里海牙軍至江陵宋荆湖宣撫朱禔孫制置使高達知荆門軍劉懋湖北提刑青陽夢炎李湜俱出降遂入江陵分道招諭未下州郡峽歸澧等州常德府新舊城各守臣以次歸順辛酉宋郢復二州安撫趙孟翟貴五郡鎮撫呂文福並以城降癸亥阿朮駐師瓜洲宋兵盡焚廬舍遷其民以去丙寅立尚牧監免京畿西京陝西今歲絲銀丁卯命孛羅爲御史大夫罷隨路巡行勸農官以按察司兼勸農事增副使僉事二員庚午師克沙市屠其城宋都統孟玘監鎮司馬夢求死之五月辛未朔阿里海牙還鄂州以廉希憲行省江陵庚辰遣高達安撫湖南帝曰昔我國家出征所獲城邑卽委而去之未嘗留兵戍守以故連年征伐不息夫爭國家者取其土地人民而已得地無民其誰與居今務保守城邑使百姓安居力

農湖南州郡皆汝舊部曲未歸者作何招懷新附者作何安集汝必熟知其事聽汝爲之辛巳宋辰隋均沅靖房六州守臣皆降荆南湖北平得府三州十一軍四縣五十七丁亥召伯顏赴闕壬辰宋統制劉師勇殿帥張彥王安節據常州推姚訐爲守六月庚子朔日食旣晝晦如夜星見鷄鷲皆歸宋嘉定安撫管萬壽以城降賜名順命僉四川行院事戊午招諭宋四川制置使趙定應曰比者青陽夢炎赴闕而陳蜀省事宜奏請緩師令自納款姑從所請今遣招討使畢再興宣布大信若能順時達變可保富貴毋爲塗炭生靈自貽後悔辛酉宋潼川安撫梅應春來降戊辰罷山東經畧司秋七月庚午朔阿朮集行省諸翼萬戶兵船于瓜洲阿塔海董文炳集行院諸翼萬戶于西津渡宋沿江制置使趙潛樞密都承旨張世傑知泰州孫虎臣陳舟師于焦山南北阿朮分遣水軍

萬戶劉琛循江南岸東趣夾灘繞出敵後文炳直抵焦山南麓以
倚其右招討使劉國傑趨其左萬戶忽刺出擣其中堅張宏範自
上流趨焦山北大戰乘風縱火焚其舟宋師大敗世傑虎臣走追
至圖山獲黃鵠白鵝船數百艘宋自此不能軍癸酉太白犯井癸
未分命伯顏趨臨安阿里海牙取湖南阿朮攻淮南萬戶宋都帶
李恒尚書呂師夔等取江西罷淮西行院以阿塔海董文炳同署
省事辛卯太陰犯畢甲午進伯顏右丞相阿朮左丞相詔僉雲南
落落蒲納烘等砦軍萬人取察罕章未附種落增置燕南河北道
提刑按察司八月癸卯伯顏陛辭帝曰若宋君臣相率來附則趙
氏族屬可保無虞宗廟悉許如故可持詔往諭己未升任城縣爲
濟州九月己巳太白犯少民庚午從阿合馬請以軍興國用不足
復立都轉運司九諸路轉運司十一濫增課程己卯太白犯太微

西垣上將乙酉罷襄陽統軍司丙申命王昔帖木兒爲御史大夫
括江南諸郡書版及臨安秘書省乾坤寶典諸書冬十月戊戌朔
享太廟牲仍用牛癸丑太陰犯畢十一月丁卯阿里海牙圍潭州
乙亥伯顏分兵三道趨臨安阿剌罕率步騎自建康四安廣德出
獨松關董文炳率舟師循海由澈浦至浙江伯顏與阿塔海居中
節度諸軍期並會臨安己卯宋都帶次隆興宋轉運判官劉槃降
都統密佑不屈死江西諸郡相繼歸附得府州六軍四縣五十六
壬午伯顏屠常州宋守臣姚訔陳炤王安節皆死之劉師勇奔平
江改順天爲保定府乙酉阿剌罕克廣德知軍令狐槩降丙戌太
陰犯軒轅大星庚寅伯顏遣降人游介實奉璽書副本至宋十二
月戊戌填星犯亢辛丑董文炳次許浦宋都統祈安以本軍降甲
辰伯顏次平江宋都統王邦傑知府潛說友通判王矩之迎降丁

未改諸站提領司爲通政院整飭諸驛戊申太陰犯畢宋主遣右
史陸秀夫奉書尊帝爲伯父世守子姪禮請和伯顏不許丙寅阿
剌罕次安吉宋安撫趙與可以州降置四川馬湖路省重慶路降
化縣入南川瀼州海山縣入昌黎復置華州鄭縣蘆州平谷縣是
月祀天始用香酒脯鸞行一獻禮通考云用呂文煥言始權江西茶
以會于五十貫準中統鈔一貫是歲天
下戶四百七十六萬四千七十七

十三年丙子春正月丁卯朔阿里海牙克潭州宋安撫李芾知衡
州尹穀闔室自焚死轉運使鍾蜚英都統陳義自殺參議楊霆赴
水死湖南平得府一州六軍二縣四十伯顏次嘉興宋安撫劉漢
傑出降董文炳至乍浦宋統制劉英以本軍降辛未文炳至海鹽
守臣王與賢胡全沈世隆皆降壬申江回易庫于諸路掌市易幣
帛諸物辛巳伯顏次崇德宋相陳宜中遣侍郎劉庭瑞等來迓且

約面議降事甲申伯顏至阜亭山董文炳阿剌罕以兵來會宣中
違約不至宋主遣使賫傳國璽及降表詣軍前其辭曰大宋國主
曩謹奉表于大元仁明神武皇帝陛下曩眇焉幼冲遭家多難權
奸賈似道背盟誤國至勤興師問罪曩非不欲遷避以求苟全自
知天命有歸避將焉往惟是世傳鎮寶不敢愛惜謹奉太皇太后
命戒痛自貶損削去帝號以兩浙福建江東西湖南二廣四川見
存州郡悉上聖朝為宗社生靈祈哀請命伏望聖慈矜全不忍曩
三百年宗社遽至殞絕令趙氏子孫世世有賴不敢弭忘伯顏以
其表不稱臣仍書宋號不受乙酉師次臨安北十五里宋陳宜中
張世傑劉師勇等挾益廣二王出嘉會門渡浙江遁去

輟料錄云伯顏
駐軍阜亭山遣

于戶囊加歹等入城慰諭令居民門首各貼好投降拜三字及闔益王廣王如婺州即命分兵屯守

諸門時范文虎安營江高太皇太后望祝曰海若有靈當使波濤大作一洗而空之無何朝夕

日不至阜

丙戌宋主易稱臣降表至己丑遣千戶囊加帶賫璽北上

馬安然

掃葉山房

二月丁酉日中有黑子相盪如鵝卵庚子宋主焜率文武官詣祥
駟殿望闕上表乞爲藩臣遣賈餘慶謝堂家鉉翁劉岳等充祈請
使詣闕待命且命文天祥同行伯顏承制以臨安爲大都督府命
忙古帶范文虎八視事西浙平得府八州六軍一縣八十一辛丑
師克臨江軍未知軍陳元桂死之丁未慰諭臨安官吏軍民詔曰
問者丞相伯顏上奏宋母后幼主暨諸大臣百官已於正月十八
日登輿綬奉表降附朕惟自古降王必有入覲之禮已遣使特往
迎致爾等各守職業勿復妄生疑畏凡歸附以前犯罪悉從原免
公私逋欠不得徵理一應抗拒王師及逃亡嘯聚者並赦其罪百
官有司諸王邸第三學寺監秘省史館及禁衛諸司各宜安居州
郡官吏勿得依殘宋故事擅自科歛所有山林河泊薪木花果魚
蝦菱芡諸物聽民採取權免徵稅太常寺祭器樂具法服樂工鹵

薄儀衛宗正譜牒天文地理圖書及典故文字戶口版籍盡數收
取前代聖賢之後及高尚儒醫僧道十筮通曉歷數並山林隱逸
名士窮居不能自達者所在官司具以名聞名山大川寺廟或歷
代名人遺跡不許侵毀鰥寡孤獨不能自存者量加贍給且命伯
顏入宋宮收衮冕圭璧符璽及宮中寶玩車輅輦乘麾仗等物戊
午宋制置使夏貴以淮西降得府二州六軍四縣三十四三月戊
辰禁江南及西番僧持軍器甲戌宋宗長福王與芮來軍中文天
祥自鎮江亡入真州乙亥伯顏發臨安北還留忙兀台鎮浙西峻
都鎮浙東董文炳阿剌罕經畧浙閩丁丑阿剌罕等入宋宮宣詔
趨宋主八觀宣讀至免繫頸牽羊之語宋太后全氏泣謂宋主曰
荷天子聖慈活汝當望闕拜謝拜畢子母肩輿出宮唯太皇太后
謝氏以疾暫留戊寅立淮西廬州總管萬戶府乙酉吉袁顛南四

郡來歸閏月丙申置宣慰司于濟寧路主印造交鈔供江南軍儲

立尚珍署收掌濟寧諸處子粒供酒材汪惟正畧地涪州克山寨

谿洞二十三所甲子以郝禎參知政事夏四月乙丑朔省東川行

樞密院及成都經畧司入西川行院已卯以侍衛親軍征戍久放

令還家期以六月各赴軍五月乙未朔宋主焘至上都降封瀛國

公西湖類稿云宋少帝三宮入燕世祖命宰相出通州迎黃羅張幔先燕三宮于會同館然後十次開筵月支糧萬石日支食肉六十觔以平宋遣官告

天地祖宗于上都之近郊自上年十二月于國陽麗正門東南七里建祭臺設昊天上帝皇地祇位行一獻禮自後國有大典禮皆卽南郊告謝

宋益王昞稱帝于福州癸卯復沂莒膠密寧海五州所括防城軍

為民免其租徭二年乙巳阿朮遣兵攻拔秦州之新城丁未宋揚

州都統姜才攻灣頭堡親軍千戶董士元戰死戊申改博州為東

昌路升閬州為保寧府六月甲子朔以孔子五十三世孫曲阜縣

尹孔治兼權主祀事己巳置行戶部于大名造交鈔通江南貿易

宋江西制置黃萬石以其軍來降辛未命阿里海牙征廣西罷兩浙大都督府建行尚書省於鄂州臨安壬申設諸路宣慰司以行省官爲之並帶相銜其已立行省者不更設宣慰司甲戌命贊善王恂都水少監郭守敬更造新歷復召許衡赴京商訂戊寅詔作平金平宋錄及諸國臣服傳記壬辰宋淮東制置使李庭芝留安撫朱煥守揚州與姜才率步騎東走泰州阿木分道追及圍之秋七月乙巳朱煥以揚州降乙卯宋泰州守將孫良臣獻城李庭芝姜才被執不屈斬之師入真州宋守將苗再成死之通滁高郵諸州相繼來附淮東平得州十六縣三十三八月己巳敕漢軍都元帥李庭將侍衛軍征河西庚辰以銅爵二豆二獻于太廟敕常饌外益以野豕鹿羊葡萄酒宋太皇太后謝氏至燕降封壽春郡夫人九月壬辰朔改作太廟金主太祖主題曰成吉思皇帝睿宗主

題曰太上皇也可那顏皇后皆題名氏癸卯以平宋大赦天下丙
 午敕常德府歲貢包茅丁未隳汧淮及襄漢荆湖諸城甲寅太白
 入南斗乙卯升吐番哈答城為寧遠府辛酉阿木八覲奏得江淮
 及浙東西湖南北府三十七州一百二十八關一監一縣七百三
 十三冬十月戊子大軍分道取閩廣命阿剌罕董文炳忙兀台唆
 都以舟師出明州塔出呂師夔李恒以騎兵出江西十一月戊申
 阿剌罕克處州宋秀王與樺觀察使李世達監軍趙山瑒察訪使
 林温被執皆不屈死旋破建寧府邵武軍壬子賜龍答温軍有功
 者鈔帛宋主昞航海趨潮州癸丑阿剌罕軍至福州宋招捕使王
 積翁為內應府尹王剛中迎降乙卯太陰犯填星敕管民官及理
 財官由中書省銓調軍官由樞密院定擬十二月辛酉朔熒惑掩
 鈎鈴丁卯改雲南蘿蔔甸為元江府路滇志作戊辰宋提舉市舶使

蒲壽庚以泉州降遂徇興化軍宋知軍陳文龍被械死宋主昱次
惠州甲子門遣倪宙奉表請軍前請降壬申有告運使姜毅所言
多不軌指毅妻子爲證帝曰妻子豈爲證者耶置弗問庚寅詔諭
新附府州軍縣官吏軍民曰昔以萬戶千戶漁奪其民致令逃散
今悉以人民歸元籍州縣凡管軍將校及宋官吏向有以勢奪民
田廬者俾各還本主無主則以給附近民之無產者其田租商稅
茶鹽酒醋金銀鐵冶竹貨湖舶課程從實辦納故宋繁冗科差如
聖節上供經總制錢等百有餘條悉與除豁改瑞安府爲温州隴
州爲散府薊州復置豐潤縣升灤陰縣爲灤州臨洮渭源堡爲縣
分立東西二川行樞密院以合丹濶里吉思領東院攻合州不花
李德輝領西院攻重慶阿里海牙破靜江宋守帥馬暨黃文政張
虎提刑鄧得遇俱死之廣西州郡皆下是歲東平濟南泰安德州

漣海清河平灤西京等州皆水旱缺食賑軍民站石米二十二萬
五千五百六十石粟四萬七千七百十二石鈔四千二百八十二
錠有奇天下戶一千五百七十八萬八千九百四十一

其詩曰侍臣已寫歸降表
臣妾僉名謝道清是也

西湖類稿云宋
降表僉謝后名

十四年丁丑春正月癸巳大軍進廣東宋循梅二州守臣劉興錢
榮之迎降新會令曾逢龍東莞義民熊飛戰死丙申以江南平百
姓疲于軍供免今歲絲銀召天師三十六代孫張宗演至京賜號
演道靈應冲和真人還江南領諸路道教置江淮都轉運鹽司及
權茶轉運司

通考云定茶引長短法以三分取一每長引計茶一百二
十觔收鈔六錢四分短引計茶九十觔收鈔四錢二分

丙辰阿剌罕

破汀關宋汀守黃去疾監軍吳浚並降二月癸亥彗星出東北長
四尺餘宋瑞州安撫姚文龍張文顯來降其家屬爲宋所害各賜
鈔優之甲戌西川行院兵至重慶營浮屠關宋都統趙安張珪降

壬午墮江西諸城惟隆興濱江仍舊丁亥宋知南恩州陳堯道僉
判林叔虎涪州陽立各以城降命李羅爲樞密副使兼宣徽使領
侍儀司事遣吳浚至漳州說文天祥天祥斬之三月辛卯以廣西
二十四郡歸附復建行省于潭州置廣南西路宣撫司于靜江癸
巳敕行都水監兼領漕運乙未安建寧漳泉等郡守臣邨德傅李
珪郭贊李公度皆以城降壬寅克廣東肇慶府新封等州乙巳命
中外官所佩金銀符用色組繫于肩腋以免褻瀆著爲令庚戌四
川南平軍都掌蠻羅計蠻及鳳凰中壠羅韋高厓四砦與播州土
官楊邦憲思州土官田景賢相繼送款癸丑命汪惟正自東川移
鎮鞏昌廣南西路慶遠鬱林昭賀藤梧融賓柳象邕廉容貴潯悉
平得府一州十四復設襄陽南漳二縣升崇明沙爲州夏四月甲
子宋特磨道將軍農士貴安平州李惟屏來安州岑從毅以所屬

溪洞百四十七來附癸酉省各路轉運司八總管府設鹽轉運司
四置榷場于碣門黎州與吐番貿易丙戌禁江南行用銅錢五月
癸巳京畿不雨嚴酒禁犯者籍其家癸卯立廣西欽橫二州安撫
司敕江淮新附官三品以上各遣質子一人入侍西番長阿立丁
寧占等三十一族來附辛亥河南山東饑弛河泊禁乙卯選蒙古
漢軍相參宿衛秋七月戊子朔罷大名濟寧印鈔局丁酉敕自今
非佩符使臣及軍情急速不聽乘傳癸卯諸王昔里吉劫北平王
南木合囚丞相安童脅諸王以叛使通好海都海都不納遂率西
道兵至和林北帝命伯顏往擊大破之諸王忽魯帶率屬來歸與
伯顏軍合乙巳宋張世傑復入邵武軍丙午初立行御史臺于揚
州統淮東淮西湖北浙東浙西江東江西湖南八道每道各增置
提刑按察司仍總居內臺令彈劾行省宣慰管軍管屯諸色官吏

非違初置行臺其秩如內臺二十七年專蒞江南之地號南臺西行臺初由雲南廉訪司升大德初移治陝西號西臺蒞陝西甘肅四川雲南諸地其秩如南臺命相威

爲御史大夫設行臺監察御史立行中書省于江西以塔出爲右

丞呂文煥爲左丞張榮實李恒也的迷失程鵬飛蒲壽庚並參知

政事帥師定閩廣壬子權大都商稅八月戊午朔新建太廟于大

都李恒自將攻文天祥于興國天祥走至空坑得脫裨將鞏信力

戰死招討使趙時賞被擒九月丙申廣南東路廣連韶德慶惠潮

南雄英德等郡皆平戊申也的迷失復破邵武軍入福州宋主昱

次廣州之淺灣詔塔出與李恒呂師夔以步卒出大庾嶺忙兀帶

唆都蒲壽庚及元帥劉深等以舟師下海合追宋二王冬十月丙

辰朔日食甲申增海畧地至夔府毀其城唆都破興化軍獲守帥

陳瓚車裂之屠其民十一月戊子文天祥與其徒趙孟澹復起兵

行省發兵攻之孟澹被殺天祥僅以身免執其妻子赴京師乙未

定偽造寶鈔同情者並死改稱宋曰亡宋行在曰杭州劉深攻宋

主昱于淺灣張世傑退保秀山十二月丁卯以大都物價翔踴發

官廩萬石賑糶貧民庚午梁山軍袁世安以其城及金石城軍民

來降乙亥導任河復民田三千餘頃以耿仁參知政事是歲賑東

平濟南等郡饑民米三萬一千徐石粟二萬八千石鈔萬一百錠

十五年戊寅春正月辛卯遣阿老瓦丁將兵戍斡端城己亥禁軍

民畧賣良家子女賜湖州長興縣金沙泉名瑞應泉唐時用此水造紫
簡茶進貢有司具

牲幣祭之始得水事訖輒涸宋末屢加浚治泉不出室
是中書省遣官致祭一夕水溢可溉田千畝因賜今名丙午萬戶禿滿答兒克瀘州

宋安撫王世昌死之戊申降封宋福王趙與芮平原郡公庚戌師

入重慶宋涪州守將王明及其子忠訓總管韓文龍張遇春皆死

之二月戊午祀先農令蒙古胄子代耕籍田癸亥升華亭縣為松

江府復立河中府萬泉縣辛未以蜀地多嵐瘴弛酒禁丁丑熒惑

犯天街壬午峻都攻潮州屠其民知州馬發死之置太史院掌天文歷法以祭酒許衡兼領三月乙酉命忙兀帶峻都蒲壽庚行省福州鎮撫瀕海諸郡合刺帶爲公海經畧使帥舟師南征丁亥太陰犯太白戊子犯熒惑甲午西川行院招降重慶等處得府三州六軍一監一縣二十柵四十蠻彝司一並招宜勝土恢等城及石榴寨相繼來降壬寅詔諸路歲比不登免今年田租絲銀乙巳楊文安克咸淳紹慶二府斬郡守鮮龍廣南宣慰使招降雷化高三州宋主昷奔化之礪州尋歿廣王昺嗣立夏四月乙卯敕脩會川縣盤古氏祠以時雨霑足弛酒禁民哀疾者官爲醞釀量給之戊午以江南土寇竊發遣官分道撫治檢覈錢穀察郡縣災傷吏廉能者舉以聞其貪殘不勝任者劾罷丁丑雲南行省招降臨安白衣和泥分地城寨一百九所威楚金齒落落分地城寨軍民三萬

二千二百戶禿老蠻亳州筠連等城寨十九所壬午立行中書省

于建康勅自今罷免之官宰執為宣慰宣慰為路官路官為州官

以淮浙鹽課直隸行省宣慰官勿預改北京行省為宣慰司五月

癸未朔定武官承襲制凡主兵官有功陞秩者其原職不得令子

孫復任惟陣亡者始得襲本職病故者授官降一等總把百戶老

死者不襲具為令通考云詔渡江總把百戶有功升遷者總把依千戶降等承襲百戶無遞降職名則從本等甲午敕諸職官

犯罪受宣者聞奏受敕者從行臺處治凡選法自一品至五品為宣授以制命之六品以下為教授則中書牒署者

受省劄者按察使處治其宣慰司案牘聽本道按察使磨刷一應

罪犯有司勘明俟按察使審覆依例彙奏自行省以下公務小事

七口中事十五日大事三十日為限乙未改烏蒙路隸雲南六月

乙卯升西番李唐城為州濟南府為路降西涼府為州宋王昺徙

居新會之匡山丁卯置甘州和籩提舉司以備軍餉賑貧民甲戌

汰江南冗官淮西宣慰使昂吉兒入覲言阿合馬所立江西權茶
運司及諸路轉運提舉等官多至五百餘人帝顧謂左右曰江南
官吏太冗省臣姚樞輩知而不言昂吉兒乃爲朕言之近侍因奏
阿里海牙屬吏張鼎其人亦參政矣帝卽命罷斥傳旨省院臺及
翰林院今爲行省宣慰及各路達魯花赤佩金虎符者多謬濫可
大加裁汰于是以隆興省併入福建仍削各官所帶相銜罷權茶
營田司歸本道宣慰司漕運司歸行省各路總管府計戶數多寡
分上中下三等設官改江南總管府爲散府者七爲州者一散府
爲州者二乙亥敕諸司奏事必登起居注戊寅全州西延溪洞猺
蠻二十所內附己卯命張宏範爲蒙古漢軍都元帥李恒副之由
海道討宋餘衆秋七月壬午朔宋湖南制置張烈良提刑劉應龍
起兵應厓山阿里海牙追襲之二人皆戰死甲申增行臺監察御

史四員江南湖北道嶺南廣西道福建廣東道並設提刑按察司
 改京兆府為安西府太倉為御廩資成庫為尚用監併皮貨局入
 總管府丙申復建行省于贛州轄福建江西廣東諸省八月壬子
 朔追毀宋故官所受告身壬戌漳州安撫使沈世隆守建寧降人
 郭贊持張世傑偽檄至世隆執斬之行省謂世隆擅殺官籍其家
 帝曰世隆何罪命還其貲仍授本路管民總管甲戌以川蜀山寨
 播洞既平其渠州禮義等城仍留兵鎮守餘悉撤毀己卯立提刑
 按察司于畏吾兒分地辛巳升洛磁為廣平府路諭行省唆都蒲
 壽庚曰東南島嶼諸國向有慕義之心可因番舶諸人宣布德意
 誠能來朝朕將寵禮之其往來互市俾各從所願

續資治云有星隕于廣
 南色紅大如箕中爆裂

為五既陸地聲如
 鼓一時頃乃止

州設四宣慰司戊子分據諸路所括軍為民冬十月己巳張宏範

統舟師由海道襲漳潮惠三州李恒將步騎由梅嶺襲廣州時廣南諸郡相繼復爲宋陷庚午徙河南北道按察司治南京十一月丁亥以辰沅靖鎮遠等郡蠻獠接壤民不安業命塔海程鵬飛並爲荆湖北道宣慰使置司常德路壬辰阿里海牙畧地至瓊州宋安撫使趙與珞冉安國黃之傑皆死之己亥定巳除官不之任者並削籍辛丑建寧人黃華集鹽夫及畚民爲亂丁未移浙江行省治杭州立淮東宣慰司于揚州閏月庚戌朔羅施鬼國王阿榨內附立羅甸軍民安撫司辛亥太白熒惑填星聚于房甲寅置光祿寺領尚飲尚醞等局癸亥李恒入廣州張宏範攻漳州得山寨百五十戶百萬十二月己丑授西南番阿永都掌蠻得蘭紐並安撫使丙申從播州安撫楊邦憲請以鼎山縣仍隸播州等改播川縣壬寅張宏範屯潮陽文天祥走五坡嶺遣前鋒張宏正追執之送

大都

大方通鑑云天祥至燕丞相李羅召見欲使跪天祥仰首而言曰天下事有與有廢自古帝王將相滅亡誅戮何代無之天祥今日至此願早求死李羅曰且問盤古至今幾帝幾

逃者乎天祥曰丞相豈以予前為宰相賣國與人而後去之耶賣國者有所利而為之必不去去

者必非賣國者也子前辭右相之命而使領軍前被留不遣已而賊臣獻國吾職當死所以不

死者以度宗二子在浙東故也李羅曰德祐幼君非汝君耶棄廟君而立二王忠乎天祥曰德祐

吾君也不幸失國當此時社稷為重君為輕二王之立原為宗社計從懷愍而北者非忠從元帝

者為忠從徽欽而北者非忠從高宗者為忠李羅曰汝立二王成得甚事天祥曰國家不幸喪亡

吾立君以存宗社存一日則盡臣子一日之責人臣事君如子事父母父母有疾雖

甚不可為豈有不藥之埋惟盡吾心焉不可為則天也何必多言李羅怒命囚于獄

丙午禁王

泉山樵採漁弋戊申追封伯夷昭義清惠公叔齊崇讓仁惠公加

封程顥豫國公制曰朕惟三千之徒莫先顏氏睠言往哲式克似

之故河南伯程顥體備至和躬承絕學元氣之會鍾于獨得聖人

之道賴以復明繫百世之真儒豈追崇之可後爰蒐盛典爵以上

公於戲緬想德容儼揚休而山立新禮命敷渙號以風行服此寵

章益綿道脉程頤洛國公制曰朕惟孟氏以來千有餘歲不有先

覺孰任其傳故伊陽伯程頤本諸躬行動有師法謂初學入

始

乎致知格物謂隨時從道在乎觀象玩辭遺書雖見於表章異數
尚稽於封冊胙之大國庸示褒崇於戲規矩準繩庶有存夫矜式
火龍黼黻匪徒侈其儀章懋相人文以對休命見河南藝文志置屯田總管
府于開城路復臨淄臨朐清河爲縣導肥河入于鄆淤陂盡爲良
田是歲會諸王于大都分賜宋寶金器幣

冊曰南北混同天開一統惟斷惟謀蹀金蹀宋臨安之亡獨
慨諸臣坐視傾覆誰殉以身不如金末節士嶙峋

張宏範李恒兵至崖山張世傑走宋王昀及其官屬俱蹈海死宋
亡前後得尸一千一百八十四萬八百有六二月戊寅游升澤州
爲路遣使訪通皇極數都陽祝泌子孫獲其書以獻於宋增置

後二衛都指揮司共爲五衛建司天臺二一者製金像三三表
高四尺又于上都洛陽等五處分置儀表各設監候官癸卯敕大都

大都

大方通鑑云天祥至燕丞相李羅召見欲使跪天祥仰首而言曰天下事有興有廢自古帝王孰與孰廢天祥曰一部十七史從何處說起李羅曰且問自古曾有人臣將宗社與他國而復

者必非賣國者也子而等右相之命而使在館中彼羅不遣已而誠臣國者職當死所以不

死之內也

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

吾君也不平天國前此府校為重者為地二王之立原為宗社計從廢怒而北者非忠從元者

元史類編卷之三

仁和邵遠平戒山學 南沙席世臣鄧客氏校刊

天王一

至元十六年己卯春正月甲寅移贛州省治還隆興辛酉宋合州安撫王立降詔殺立既而赦之召入覲仍其故官自是東川州縣皆下壬戌分川蜀為四道以成都等路為川西道廣元等路為川北道重慶等路為川南道順慶等路為川東道並立宣慰司甲戌張宏範李恒兵至厓山張世傑走宋主昷及其官屬俱蹈海死宋亡前後得戶一千一百八十四萬八百有六二月戊寅朔升溧州為路遣使訪通皇極數鄱陽祝泌子孫獲其書以獻癸未增置前後二衛都指揮司共為五衛建司天臺于大都製銅儀象圭表銅表高四尺又于上都洛陽等五處分置儀表各設監候官癸卯敕大都

河間山東鹽運司並兼酒醋商稅甲辰發嘉定新軍屯田脫里北

之地命嘉定新附州郡及田楊二家諸貴官子俱充質子八侍乙

已立西蜀四川道提刑按察司志作十九年增詔河南西京北京各路課程

聽宣慰司兼領圖太祖太宗睿宗御容于翰林院命院官春秋致

祭三月戊申朔詔大兵渡江以來農民不無騷動今已安集務宜

敦本力田各正官以時勸課如無成效者糾察見典章遣郭守敬由

上都大都歷河南府抵南海測驗晷景丙寅敕中書省凡掾史文

移稽緩一二日者杖三日者死甲戌授八番龍文求為臥龍番龍

延三為大龍番龍方零為小龍番俱安撫使得洞寨一千六百二

十六命太常寺定州郡祭祀儀式及壇壝祭器圖寫成書名至元

州縣社稷通禮夏四月癸巳命給事中兼起居注掌隨朝諸奏事

復立江西權茶運司及諸路轉運鹽司宣課提舉司通考云以兩淮鹽引五萬道名商中糧

癸卯填星犯鍵閉乙巳選南軍二萬人增宿衛五月丙辰置漣海
等州總管府募民屯田丙寅敕僧司文移毋輒入遞丁卯升雲南
寶山崑渠二縣爲州癸酉行省言賦北京西京車牛皆至可運軍
糧帝曰民之艱苦汝等不問但知役民使今年盡取則來歲田禾
何由得種其止之六月丁丑朔發新附軍戍碭門魚通黎雅甲申
宋張世傑溺死海陵部將百五十八人詣瓊雷二州降癸巳雲南
都元帥愛魯將兵分定亦奚不薛抵金齒蒲驃曲蠟緬國界招降
忙木巨木禿等三百寨師還獻馴象十二亦奚不薛者羅施鬼國別部也亦曰亦乞不薛令京朝
諸官雇役開浚通州河癸卯以阿合馬子忽辛爲潭州行省左丞
從子別都魯丁爲河南宣慰使秋七月戊申置東宮侍衛軍定江
南上中路置達魯花赤二員下路一員應昌府如例設官己未改
朶哥麻思地之算木多城爲鎮西府丙寅填星犯鍵閉癸酉遣中

丞崔或訪求江南藝術之人八月庚辰太陰犯房距星戊子海賊
 賀文達降括所掠婦女還之民庚寅敕沅州總管乞答合征取桐
 木籠狃猪伯洞諸蠻海賊金通精死獲其從子温有司論如法帝
 曰通精已死温何預焉特赦其罪詔每歲聖誕元辰禮儀費用名
 為已俸無非科斂民財應一切停止

典章云每遇聖誕元辰前期一月文武官躬詣寺觀啟建祝延聖壽萬安道場本日

質明朝臣詣闕稱賀外官則率僚屬備生耆老僧道人等結綵香案呈舞百獻夾道祇迎就寺觀叙班舞蹈三呼畢公宴而散其費皆督之里下以為常

丁酉以江南

所獲碧玉爵及玷凡四十九事納于太廟庚子歲星犯軒轅大星
 甲辰定漢軍出征逃者死且沒其家女真水達達軍不出征者隸
 民籍輸賦九月庚戌以忽辛兼領杭州諸色人匠歲造繪段十萬
 匹置大護國仁王寺總管府建聖壽萬安寺于京城己巳統軍唐
 兀帶麻陽達魯花赤武伯不花劫掠辰沅新附民千餘口詔即軍
 中斬之冬十月乙酉帝御香閣命大樂署令完顏椿等肄文武樂

丙申太陰犯太微西垣上將十一月丙午詔皇太子燕王參決朝政凡事先威後聞戊申敕諸路所捕盜初犯賊多者死再犯賊少者從輕論罪有盜以舊鈔易官庫新鈔百四十錠者有司謂罪不應死帝以其父執役巨家卽論如法癸丑太陰犯熒惑己巳併敎坊入拱衛司十二月甲申祀太陽丁酉八里灰貢海青回鶻等所過供食羊非自殺者不食百姓苦之帝曰彼吾奴也飲食敢不隨我朝乎禁勿與降歸州路爲州升沔陽安陸各爲府濟寧安西慶遠建寧漳惠梧州象邑賓橫容潯諸府州並爲路

十七年庚辰春正月丙辰定遷轉官員法凡無過者授見闕物故及過犯者選人補之滿代者令還家以俟又定諸路差稅新增者卽上報隱漏者加罪不必履畝清丈動搖百姓戊辰放荆南江廣所俘男婦三萬二千餘人爲民置福建行省于福州尋移泉州改

德慶路爲總管府二月乙亥命和禮霍孫將兵與高和尚同赴北

邊

時有言高和尚善術能役鬼爲兵故有是役

己丑瀘州安撫梅應春前爲宋制置張珏所殺

其子國賓詣闕訟寃帝命以珏界國賓俾復父讐珏聞之自經死

三月乙卯立都功德使司掌帝師所統僧徒并吐番軍民事賜國

師掌教所印辛未立畏吾境內交鈔提舉司柳林營田提舉司給

月脫古思八部屯田牛具陝西轉運使郭琮等殺安西王相趙炳

詔逮琮等誅之夏四月壬申朔升宣德龍門鎮爲宣德縣隆興楊

門站爲懷安縣丁亥立杭州金玉總管府庚子歲星犯軒轅大星

山東諸郡霜真定路蟲皆損桑五月甲辰作行宮于察罕腦兒之

北丙午升沙州爲路并括戶丁以富戶餘田分戍軍耕種六月辛

未朔新歷成詔曰自古有國牧民之君必以欽天授時爲立治之

本黃帝堯舜以至三代莫不皆然爲斯官者皆世守其業隨時考

驗以與天合故歷法無數更之弊及秦滅先聖之術每置闕于歲
終古法蓋殫廢矣由兩漢而下立積年日法爲推步之準因仍沿
襲以迄于今夫天運流行不息而欲以一定之法拘之未有久而
不差之理差而必改其勢有不得不然者前命太史院作靈臺制
儀象日測月驗以考其度數之真積年日法皆所不取庶幾昭合
天運而永終無弊比日新歷告成賜名授時歷頒行天下布告遐
邇咸使聞知見典章壬申安西王薨罷王相府壬辰頒鈔法于江淮
廢宋舊錢并括銅器戊戌阿合馬矯殺江淮平章阿里伯右丞燕
帖木兒崔斌等秋七月戊申太陰掩房距星巳酉太陰犯南斗徙
泉州行省治隆興戊午阿合馬薦郝禎耿仁並爲中書左丞用姚
演言開膠東河屯田漣海乙丑罷江南財賦總管府併大都鹽運
司入河間割建康民二萬戶種秫歲輸釀米三萬石巳巳遣中使

歷江南名山訪求高士且命持香帛詣信州龍虎山臨江閣皂山
 建康三茅山設醮八月庚午朔改蒙古侍衛總管為蒙古侍衛親
 軍都指揮使丙子太陰犯心東星丁丑峻都請招三佛齊等國不
 允是月許衡致仕姚樞卒九月甲子太陰掩右執法并犯歲星丁
 卯羅施鬼國王阿察阿里降召入覲冬十月丁丑遣湖南兵萬人
 伐亦奚不薛降其民亦奚不薛稱疾遣從子入朝帝曰彼不稟命
 輒以職授從子無人臣禮宜令亦奚不薛出始罷兵壬午立陝西
 四川行中書省己丑以都實為招討使往西域窮河源

按河源古無所
見自漢使張騫

道西域度王門見二水交流發葱嶺趨于闐匯鹽澤伏流千里至積石而再出唐薛元鼎使吐番
 訪河源得之闐磨黎山世之論河源者皆推本二家其說近誕元潘昂霄以都實使還得其詳撰
 河源志謂源在吐番朶甘思西鄙有泉百餘泓沮洳散渙弗可逼視方可七八十里燦若列星名
 火敦腦兒譯言星宿海也羣流奔轉近五七里匯為一巨澤名阿刺臘兒自西而東連屬成川號
 赤賓河又合亦里赤忽闌也里木三河其流浸大始名黃河又岐為入九股行二十日至大雪山
 名騰乞里塔即崑崙也由此而南至瀾即及瀾提二地始相屬又經哈刺別里赤兒之地合細黃
 河及乞兒馬赤二水北行復折而西流過崑崙北又轉而東北行約二十餘日至積石始入中國
 世言黃河九折蓋彼地有二折云都實受命自河州起行四閱月始抵其地經還圖其城傳形勢

來上帝悅
命往營之

丙申定在官者任事一月始給俸初置象輦以備巡幸十

一月已亥朔置泉府司掌御用及太后太子諸王出納事戊申敕

疏通鈔法凡賞賚多給幣課稅多收鈔是月廉希憲卒十二月戊

寅加奉使木剌彘國速刺蠻為招討使壬辰福建陳桂龍及其兄

子陳弔眼據漳州反元帥完者都擊之走八畚洞甲午重建太廟

成奉遷神主于祔室迎太祖睿宗二金主入新廟行大亨禮置北

庭都護府掌畏吾兒之居漢地者阿朮卒于軍改雷廉封化高五

州為路徙峽州路于江北舊治復置鄆縣隸鞏昌是歲置權茶都

轉運司于江州總江淮荆湖福廣之稅通考云除長引專用短引每茶一引收鈔二兩四錢五分是年命戶部大定

諸例全科戶丁稅每丁粟三石驅丁及減半科戶丁稅每丁粟一石新收交黎戶第一年五斗第
二年七斗五升第三年一石二斗五升第四年一石五斗第五年一石七斗五升第六年八丁稅
協濟戶丁稅每丁粟一石凡輸納之期初限十月
中限十一月末限十二月違者初犯笞再犯杖

十八年辛巳春正月丁未敕江南州郡官蒙古回鶻人兼用丙辰

三五頁
卷三十一
世祖二

改符寶局爲典瑞監收天下諸司印二月乙亥發刑徒減死者爲
軍征海外立上都留守司升敘州爲路隸安西省移潭州省治鄂
州湖南宣慰司治潭州丙戌發肅州軍民穿渠溉田乙未皇后宏
吉刺氏崩皇太子真金自獵所奔至三月己亥立登聞鼓院有寃
者許撾鼓以聞是月許衡卒夏五月癸卯禁西北邊回鶻人越境
爲商丙辰歲星犯右執法庚申分烏蒙路隸雲南順慶路隸川東
詔括契丹戶嚴鬻人禁安西軍站凡和雇和買與民均役秋七月
甲午朔置和中所于甘州以儲兵糧癸卯太陰犯房距星庚戌松
州知州僕散忒哥前後射虎萬計賜號萬虎將軍八月甲子朔招
討使方文言擇守令崇祀典戢奸吏弭盜賊整軍旅獎忠義六事
下廷臣議行丙寅熒惑犯諸侯西第三星壬辰海南諸國貢犀象
閏月癸巳朔熒惑犯司怪南第二星庚戌太陰犯昴丁巳命播州

每歲親貢方物壬戌兩淮轉運使阿刺瓦丁坐盜官鈔伏誅詔給
怯薛歹糧拘其所占田爲屯田九月癸酉定市舶商貨已經泉州

抽分者他處止令輸稅

通考云立市舶司于泉州慶元上海澈浦每歲招集船商于外
番博易珠翠香料等物回帆依例抽解後聽自貨賣官爲十分

取一粗者十五分取一時客船自泉福販土產物者所徵亦與番貨
等上海市舶提控王楠以爲言於是定以雙抽爲販貨單抽爲土貨

甲申太陰犯軒轅大

星冬十月乙未以皇后祔享太廟乙巳命安西王府協濟戶及南

山隘口軍于延安鳳翔六盤等處屯田丁未置河西織毛段匠提

舉司已酉命張易等叅校道藏諸書惟留道德經餘悉焚毀庚戌

詔諭于不昔國來附壬子置各省蒙古提舉學校官擢管軍千戶

程文海爲集賢直學士兼秘書少監和禮霍孫守司徒改諸路屯

田孛蘭奚總管府爲農政院十一月癸亥朔詔諭探馬赤令歸附

探馬赤譯言
衆部族也

甲子賊首陳弔眼伏誅桂龍降流之邊地甲戌太陰犯五

車次南星丁丑犯鬼丁亥太陰掩心東星十二月甲午命筵吉刺

帶為右丞相阿合馬為左丞相丙午太陰犯軒轅大星癸丑免益都淄萊寧海開河夫今年租賦仍給其備直免福州路十八年以

前逋賦是歲揚州火通泰二州饑發粟二萬石賑之

十九年壬午春正月壬戌朔諸王撒里蠻誘執叛王昔里吉遣使

馳報丁卯增兩浙鹽價每引鈔四貫通考云用姚元之請命江南稅糧依宋舊制折輸綿絹雜物二月辛

卯朔饒州總管姚文龍言江南財賦歲可辦鈔五十萬錠詔以文

龍為江西道宣慰使兼措置茶法通考云用耿仁言江南全輸米三之一餘並入鈔折之以七百萬錠為率歲得羨鈔十四萬其

輸米者止用宋斗斛蓋以米一石當今七斗故也甲午給甘州逃軍五千人自願挈家還戍者鈔

一萬六百二十錠每口布一疋驢一頭乙巳立廣東提刑按察司

及鐵冶總管府改羅羅斯宣慰司隸雲南浙東宣慰司治温州分

軍戍江南自歸州及江陰至三海口凡二十八所癸丑大良坪元

帥蒲元圭遣子入朝三月壬午益都千戶王著擊殺阿合馬于闕

門捕著及其黨高和尚併樞密副使張易皆醢于市夏四月丁酉
龔吉刺帶罷命和禮霍孫爲右丞相戊戌立回易庫倒換金銀昏
鈔帝以諸王公主分地所設達魯花赤例不遷調百姓苦之敕任
滿依常調選代壬寅敕于灤河造官車以給歲用母派取民甲辰
帝悟阿合馬之姦逮其子忽辛赴揚州鞫問始鈎考諸處平準庫
汰倉庫官察所占民田還其主戊申敕凡文書俟奏可始用御寶
刊行蒙古畏吾字所譯通鑑庚戌設懷孟路河渠使副官壬子制
民間貸錢息以三分爲率定內外官三年考滿叙升未滿者不得
超越命雲南諸路各建學祀宣聖五月己未朔戮阿合馬尸窮治
其黨黜省部濫設官七百十四人罷南京西京宣慰司盡拘諸位
下所給印已已遣浙西宣慰同知劉宣等理算各省鹽茶及財賦
府出納之數籍阿合馬妻子親屬奴婢財產并逮其黨耿仁別都

魯丁至大都誅之癸未以麥木丁為中書右丞張雄飛叅知政事
 乙酉令逃軍黥其面仍使從軍六月己丑朔日食癸丑罷司徒府
 及農政院丁巳亦奚不薛千戶宋添富順元總管阿里降秋七月
 戊午朔日食詔于揚州岳州各立行樞密院辛酉剖阿合馬黨郝
 禎棺戮其尸壬戌禁諸位下差軍護送私營錢貨蒙古軍守江南
 者令更番還家壬申立馬湖路總管府戊寅議建阿失答不速皇
 城用木十二萬道遠難致照察罕腦兒地築土為牆乙酉闔婆國
 貢金佛塔九月丁己朔定歲貢額上路總管府三年兩貢儒吏各
 一人下路總管府二年一貢儒吏遞進儒必通吏事吏必知經史
 中書省掾史有闕於院臺令史內選取院臺令史於六部令史內

選取六部令史以歲貢儒吏補充

見典章

進考云各路司吏有闕取所屬衙門

人吏委本路長官同儒學官考試以習行移算

術詩書論孟內通一經者為中選然後補充按察司書吏有闕府州司吏內勾補諸歲貢吏當該

官司于見役人內公選以儒吏兼通者為上才識明敏吏事熟嫻者次之月日雖多才能無取者

不許戊午誅阿合馬第三子阿散四子忻都剝其皮以狗并誅其

從子宰奴丁庚申罷漣海州屯田以游顯行省揚州領浙江漕運

辛酉海外南番俱監國主遣使奉表進寶貨及黑猿一那旺國主

忙昂以其國無識字者遣使四人不奉表蘇木都速國主土漢八

的亦遣使二人蘇木達國相臣那里八合刺攤赤以事在俱監聞

詔代其主打古兒奉表進指環印花綺段及錦衾二十合寓俱藍

也里可温主不咱兒撒里馬亦奉表進七寶項牌藥物又管領木

速蠻馬合麻亦遣使奉表同日赴闕

諸番唯俱藍最遠去泉州十萬里
招討使楊庭璧三往招之乃入貢

壬戌敕官吏受賄及侵盜倉庫輕者杖決重者死言官緘默與受贓人

一體論罪乙丑括雲南所產金置打金洞達魯花赤其稅賦用金

為則壬午釐正選法置黑簿籍阿合馬黨人之名冬十月丁亥朔

復以耶律鑄為左丞相札散平章政事丙申立詹事院置左右詹

事各一員設京畿江淮兩都漕運司歲僉江淮運糧至中灤京畿

接運至大都

通考云初立京畿都漕運使總理漕事至是分立都漕運司于河西務乃止領在京諸倉出納糧斛及新運糧提舉司站運僭運公事其在河西務者掌御河

上下至直沽河西務李二寺通州等處僭運糧斛各置運使二人

癸卯分禁中出納為三庫御用寶玉遠方

珍異隸內藏金銀質孫衣段隸右藏常課衣段綺羅縑布隸左藏

以宦者掌其鑰乙巳遣使招降法里郎阿魯乾伯等國庚戌以四

川民少止留成都廣元順慶重慶夔府五路餘悉裁去詔兩廣福

建雲南地遠五品以下官從行省銓注奏用乙卯誅阿合馬長子

忽辛次子抹速忽于揚州十二月戊午置利用庫于上都甲子召

宋衍聖公孔洙為國子祭酒兼提舉浙東學校壬申設沿河巡軍

有勢家為商賈阻遏民船者沒其家甲戌釋天下重囚除大逆外

令充征海軍丙子四川大盤洞主向臭友等來朝十二月庚寅以

張文謙為樞密副使乙未給瀛國公趙羸衣糧發遣上都殺宋丞

相文天祥于燕京

續資治云世祖重天祥才遣王積翁諭旨欲用之積翁請權為黃冠劉岳

申文信公傳云天祥初至燕館供帳如上賓天祥義不寢處越五日送兵馬司械繫空宅中十餘日得疾去械猶繫頸自是囚兵馬司者四年就戮于燕南城柴市趙昞傳云天祥至柴市問曰孰南向或右指之者即南向再拜死世祖歎曰好男子不肯為吾用殺之誠可惜是後連日陰晦

宮中白晝或秉燭適張真人入朝世祖問之對曰此殆殺文丞相所致乃贈公特進金紫光祿大夫開府儀同三司檢校太保中書平章政事廬陵郡公諡忠武令王積翁書神主洒掃柴市設壇

祀之丞相李羅初行奠禮狂飈旋地起卷主人雲中亭羅等改書前未少保右丞相信國公天始開壽帝京景物畧云江南十義士昇公葬葬都城小南門外大德二年繼子階至

都順城門內見石橋織綾婦公舊婢也為階引至葬處碑刻信公二字遂以歸廬陵癸卯詔

御史臺得自選其屬仍參用蒙古人員罷湖廣金銀鐵冶提舉司

隸各路總管府徵處士劉因為右贊善尋辭歸是歲始命上海總

管羅璧暨千戶朱清張瑄造海船六十艘由海道運糧四萬六千

石至大都

二十年癸未春正月己未立宏吉刺氏為皇后是為喃必皇后乙丑定匿名

書告事重者死輕者流遠方諭管民官凡遇灾傷過時不報及按

察使不即行視者加罪丁卯伐船材于烈燭都山乾山起運民夫

八千人己巳太陰犯軒轅御女庚午徙平灤造船廠於陽河就近
 運木庚辰太陰入南斗壬午改鞏昌按察司為河西隴北道廣東
 按察司為海北廣東道廣西按察司為廣西海北道福建按察司
 為福建海海道二月戊子定川廣戍軍三年一更仍廩其家屬立
 武成王廟于樞密院西以孫武子以下十人從祀庚寅太陰掩昴
 庚子省四川東西北三道宣慰司及潼川萬戶府新軍總管府威
 灌茂等州安撫司是夜太白犯昴辛丑定軍官選格萬戶千戶鎮
 撫自奏往日始三年為滿通行遷轉百戶以下不拘此例官吏贓
 罪自五十貫以上皆決杖除名不敘百貫以上者死乙巳太陰犯
 心甲寅降太醫院為尚書監立江南四省官醫提舉司三月丁巳
 罷河西行御史臺立鞏昌等處行工部罷福建市舶總管府併泉
 州行省入福建行省免福建歸附後未徵苗稅

通考云世古幣言船商皆以金銀易香木于是下合

禁之惟
嚴不禁

已未放五臺山及古城造寺夫四萬人是夜歲星犯鍵閉庚
申太陰犯井壬戌犯鬼乙丑罷淮安淘金官惟計戶取金立雲南
提刑按察司給西川福建兩廣之任官驛己巳歲星犯房癸酉掩
房廣州民林桂方反偽號羅平國改元延康官軍擒斬之壬午省
福建道宣慰司復立行省于漳州夏四月丙戌立別失八里和州
等處宣慰司己亥太陰犯房壬寅犯南斗庚戌四川右丞也速帶
兒招撫筠連定州諸蠻獨山都掌蠻不降進討之擒其長得蘭紐
遂班師辛亥麥木丁等檢舉萬億庫以罪繫者多請付蒙古人治
帝曰蒙古人爲利所汨亦異往日矣其擇可任者使之五月戊午
縱平灤造船軍歸耕撥大都軍代之丙寅太陰掩心東星丙子諭
雲南重囚先令便宜處決者自今恐濫及無辜仍令待報戊寅從
御史中丞崔彧言罷採民間室女頒行宋文思院小口斛立海西

遼東提刑按察司按治女真水達達部巳卯詔江南漕運于濟州

新開神山河及海道兩路兼運時上年海運方至而枯六月丙戌嚴私易金銀

禁已丑增內外官吏俸詔曰設官分職本以為民邇年諸物增價

俸祿不足養廉以致侵漁百端公私交困自今內外官吏俸給以

十分為差添支五分以示體恤臣下至意見典章辛亥四川行省討

平九溪十八洞蠻析其地為州縣隸順元路以向世雄為义巴洞

安撫大使秋七月癸丑朔免征骨嵬軍賦丙辰太白犯井癸亥太

陰犯南斗乙丑太白犯井丙寅開雲南驛路分亦奚不薛地為三

立宣慰司及總管府丁卯熒惑犯司怪丙子省江南十道宣慰司

官四十七員定上都商稅六十分取一立總教院及務農司八月

癸未以明理察平章軍國重事立懷來淘金所丙午太白犯軒轅

丁未歲星犯鈞鈴濟州新開河成立都漕運司九月壬子太白犯

軒轅少女戊午太陰犯斗象山賊元宗祖聚衆掠海上阿刺帶往
招之降其徒萬人海道以寧丙寅徒舊城市肆局院稅務入大都
止四十分徵一己巳太白犯右執法辛未以歲登開諸路酒禁壬
申太陰掩井癸酉熒惑犯鬼甲戌太陰犯鬼熒惑犯積尸氣太白
犯左執法冬十月甲午以札散爲樞密副使詔五衛軍十人爲率
以七人三人分爲二番每月放七人者還家正月復役正月放
三人者還家四月復役更替休息丙申太陰犯昴庚子建寧降賊
黃華復叛聚衆十萬號頭陀軍犯崇安浦城諸邑壬寅耶律鑄罷
戊申立和林平準庫罷中興管課及北京鹽鐵提舉司十一月癸
丑命各省印造授時歷初各省歷日皆取給京師以道遠不時至令判湖等四
省所用者隆興印之雲南四川等省所用者京兆印之設大
都城門尉戊寅太白歲星相犯十二月壬辰以中書叅議溫迪罕
禿魯花廉貧不附權勢賜鈔百錠辛丑徙新附官仕內地甲辰太

陰掩熒惑丙午罷雲南金箔規措所定質子令凡大官子弟遣赴

京師是歲以新開河運船多損壞仍事海運通考云先用王積翁議廣開新河然浙河候潮以入船多損壞

民亦苦之于是罷新河事海運立萬戶府二以未清為中萬戶張瑄為千戶忙兀結為萬戶府建魯花赤改北平都護府為大理寺給

布萬匹賑女真饑民

二十一年甲申春正月乙卯帝御大明殿羣臣上尊號曰憲天述

道仁文義武大光孝皇帝朝賀如正旦儀大赦天下詔曰惟我祖

宗創業垂統區宇之廣眾所悉知其御下也為善而有功者必賞

為惡而有罪者必罰此列聖相承之定制也比者公卿耆舊詣闕

拜章謂朕壽祉方隆奉進冊寶請上尊號屬茲大慶宣布寬條茲

用播告中外所有雜犯重典以下盡從釋免凡爾有眾自今以始

各務惟新無替朕命見典章甲子罷諸路理算官江浙平章忙忽帶

進真珠百斤丙寅立安豐芍陂兩屯戶于淮南發軍士二千人耕

之丁卯建都金齒西南彝十二部皆降

先建都為緬所制今緬破故降

立江淮荆湖江

西四川行樞密院治建都鄂州撫州成都丙子建寧賊首黃華自
殺丁丑諸路按察使陞辭帝曰卿等到官當宣明朕意勿求貨財
名成則利隨之徇利必失其名而身命且不可保尚其慎之二月
諭各路堤堰令總管府并州縣長官常行驗視遇有損壞即便修
築毋致湮沒民田聽各道按察使不時糾察貧民情願復業者給
付原產仍免一切逋課私債三年後方許取索俱見典章壬辰邕州民
黃大成爲亂梧韶衡諸州起應之甲午罷新開河役移其軍及水
手各萬人事海運丁未徙江南樂工八百家于京師戊申移江淮
行省治杭州浙西宣慰司治平江省黃州宣慰司入淮西道立法
輪竿于大內萬壽山高百尺遷宋宗室及其大臣之家屬于內地
三月丁巳皇子北平王南木合至自北邊丞相安童亦至丁卯太

廟殿成奉安神主

至元十八年依太常寺議定太廟新圖建前廟後寢廟分七室至是始成

夏四月從御史李昂

言有父兄居憲臺而子姪爲按察使或父兄爲按察使而子姪在

別道爲官者並令迴避軍官母受民詞押運母帶私貨管民官自

三月停訟十月始行和買諸物止從出產處所隨時給值不得強

其所無重累百姓

俱見典章

乙酉省泉府司八戶部立大都留守司及

總管府置西川延安鳳翔興元宣課司己亥涿州巨馬河決籍江

南鹽徒軍戊申命開元路造船百艘往狗國戍軍五月己酉立二

千戶總欽察康里子弟願爲國宣勞者己未蠲江南田賦十之二

其十八年以前逋欠盡免徵縱江南匠戶之無藝業者十九萬爲

民庚午括天下私藏天文圖識太乙雷公式七曜歷推背圖顯明

歷苗太監歷有私習及收匿者加罪閏月己卯改西南番安撫司

爲總管府給西川蒙古軍鈔使耕松江曠土四頃以下免輸稅丙

戊遷揚州行臺于杭州罷羣牧皮貨局所六月壬子遣使分道尋
訪測驗晷景日月交食歷法甲子遣軍六千人淘金雙城移和林
屯田軍于五條河秋七月丁丑朔立行福司革軍官所帶相銜八
月丁未雲南華帖白水江鹽井三處土老蠻叛殺諸王及行省使
者定軍官格例以河西回鶻畏吾兒等依各官品充萬戶府達魯
花赤同蒙古人女真契丹同漢人若女真契丹生西北不通漢語
者同蒙古人女真生長漢地者同漢人已酉遣無籍軍舊從征者
還家勿許持弓矢放福建畬軍並收其軍器散其部長於近處為
管民官甲戌以建都女子沙智立站有功令管萬戶事詔議貢舉
續資治云丞相和禮霍孫言天下習儒者少由刀筆吏得官者多帝曰將名之何對曰
惟貢舉取士為便凡蒙古之士及儒吏陰陽醫術皆令試舉則用心為學矣帝可其奏九月甲

申京師地震立福建鹽課市船都轉運司

通考云設市船都轉運使于泉杭
二州官自具船給本募人八番留

易所獲之息以十分為率官取其七人得其三比權勢家皆不出已費
入番為賈犯者籍家產之半其諸番客旅就官船買賣者依例抽稅

併江淮福建為一

省癸巳太白犯南斗甲辰海南貢白虎獅子孔雀冬十月丙午發

鈔常平倉與民和糴糴與糶同以今歲秋成爲始凡收糶最多之家官糶十分之三次年減價出糶以利貧民巴西敕管軍

萬戶爲行省宣慰使者毋兼管軍事仍爲萬戶者毋兼涖民政辛

酉敕宋有手號軍死則以兄弟及子繼之免文其手十一月庚子

太陰犯心辛丑和禮霍孫麥木丁張雄飛溫迪罕皆罷復命安童

爲右丞相盧世榮爲右丞史樞爲左丞撒的迷失廉希恕叅知政

事敕中書省整治鈔法定金銀價禁私自回易癸卯海外南巫里

別里刺理倫大力等四國各奉表來貢命司農司自襄陽至東海

募民開荒免其租六年并一切雜役十二月甲辰朔立常平鹽局

癸亥從盧世榮言禁民間釀酒官自酤賣初民間酒聽自造每米一石官取鈔一貫至是出官鈔五萬錠以權酤法

每石取鈔十貫丙寅荆湖行省招降龍昌寧龍延萬等奉羊馬白氈來貢癸

酉御史中丞崔彧言盧世榮不可居相職帝怒削彧官命翰林集

賢院名諸路醫學教授增修本草是歲西僧楊璉真伽發宋帝后諸陵及大臣家墓凡一百一所宋太皇太后謝氏卒于燕征東招討使聶古帶言海道艱阻罷征骨嵬兵

二十二年乙酉春正月戊寅弛民間買賣金銀及江淮魚利禁罷懷孟諸路竹監聽民貿易官止收稅庚辰毀宋郊天臺建佛寺戊

子增遣軍士二千人屯田芍陂歲收米四萬餘石

後屯戶至一萬四千餘人得米數十萬斛

真定民劉驢兒有三乳自以爲異謀不軌伏誅移五條河屯軍于

元失蠻札失蠻之地癸巳盧世榮奏罷江南行御史臺以所屬按

察司爲提刑轉運司俾兼錢穀隸內臺辛丑命禮部領會同館壬

寅造大樽于殿以木爲質銀內金外鏤雲龍高一丈七寸二月詔

考課官吏從前責以五事因無激勸之方徒示虛文致鮮實効自

今每歲終考課以五事備具著有成效者爲中考第一考加妻封

號二考令子弟承蔭三考封贈祖父母父母其品格不及封贈者

量遷官階有政績殊異者不次優擢凡封贈一品爵國公母妻並

國夫人二品爵郡公母妻並郡夫人三品爵郡侯四品爵郡伯母

妻並郡君正五品為縣子從五品為縣男母妻並縣君下此者止

用散官六品母妻曰恭人七品母妻曰宜人見典章乙巳增濟州漕

船三千艘役夫萬二千人初江淮歲漕米百萬石于京師海運十萬石膠萊六十萬石濟州三十萬石以水淺舟大多不能達至是更以百石

之舟每舟用四改江淮江西元帥招討司為上中下三萬戶府宿州蘄

縣真定沂邳益都高郵泲海七翼為上萬戶棗陽十字路邳州鄧

州杭州懷州孟州真州八翼為中萬戶常州鎮江潁州廬州亳州

安慶江陰水軍益都新軍湖州淮安壽春揚州泰州弩手保甲處

州上都新軍黃州安豐松江鎮江水軍建康二十二翼為下萬戶

蒙古漢人新附諸軍相參為三十七翼翼設達魯花赤萬戶副萬

戶各一員隸所在行院丙午割荆湖所隸八番羅甸歸西川析嵐
管爲二州辛亥廣東宣慰使月的迷失討平潮惠二州盜郭逢貴
等四十五寨降民萬餘戶丙辰罷膠萊所鑿新河壬戌太陰犯心
升御帶庫爲章佩監戊辰復立行御史臺于江州居江浙湖南江
西之中諸路按察司職掌仍舊從盧世榮請立規措所回買江南
民田拘收天下銅器增置真定濟南太原甘肅江西江淮湖廣諸
道宣慰司兼都轉運司嚴治課程復命龔吉刺帶爲左丞相忽都
魯平章政事罷融州總管府爲州三月禁民間不得織造銷金段
疋倡優市井諸婦不得妄用金飾釵釧等物違者沒官見典章丙子
遣太史監侯往占城測日晷癸未改甘州行省爲宣慰司隸寧夏
行省庚子詔依舊制每鹽一引四百斤價銀十兩折鈔爲二十貫
夏四月庚戌監察御史陳天祥劾盧世榮罪惡詔同赴上都面質

世榮悉欵服癸亥以麥木丁不附世榮命與安童同治省事五月

甲戌以郭佑叅知政事戊寅詔甘州每地一頃輸稅三石壬午發

軍千人修阿失鹽場倉以忻都為踢里王招討使戒毋興兵遠畧

甲申立汴梁宣慰司依安西王故事汴梁以南命親王出鎮戊子

改昇江烏定朶里滅該等府為路雲南省臣脫帖木兒陳瀾逋賦

徵侵隱戍要隘明黜陟罷轉運給親王賦豪戶除重稅決盜賊增

驛馬取質事定俸祿教農桑優學校卹死事捕逃亡十六事下中

書省議行庚寅復徙行臺于杭州行院于建康六月庚午詔減商

稅罷牙行撥耕錄云牙行本謂之互郎謂主互市者唐人書互作牙故因訛耳省市舶司入轉運司帝諭安童

曰國家大事汝蒙古人未知朕左右無復漢人可否皆自朕決汝

當盡心善治百姓無使重困致亂以貽朕羞秋七月壬申造温石

浴室及更衣殿甲戌敕秘書監修地理志戊寅分甘州新附軍屯

田亦集乃路甲申析濶里吉思所平大小十谿洞爲郡縣丁亥廣
東宣慰使月的迷失入覲言山寨降者五百餘所帝問戰而後降
耶招之卽降耶對曰是皆招降者也因言兵荒後未嘗存恤其民
州縣官復無之任者以故盜賊各據一方互相攻殺人民漸耗宜
令良吏急往撫之帝可其奏八月庚子給鈔萬二千四百錠爲本
取息贍甘肅屯軍辛丑命有司祭斗三日己未復立泉府司九月
立竹謀提舉司于衛州凡係官竹園以時採賣設府州司縣弓手
祇候公使人等免其差稅令衆戶計額均輸見典章戊辰罷權酷聽
民自造民間仍用銅器乙亥以江北諸課程聽杭鄂二省節制道
途迂遠改直隸中書省丙戌速木都刺馬答二國遣使入貢西崖
門渠長阿者等百餘戶來降冬十月己亥發鈔五千錠和糴于應
昌復分河間山東鹽課轉運司爲二丙辰遣兵戍合刺章卽烏其

部長之子令入質京師千百戶子留質雲南王所復置四川嘉定
 路及敘州宣撫司烏蒙土官阿蒙叛討擒之并其妻子伏誅十一
 月己巳朔給宋鹽軍千餘人衣糧使屯田自贍乙未盧世榮伏誅
 丙申赦囚徒黥其面及宋時私販軍並從征海外十二月丁未皇
 太子真金薨諡曰明孝太子己未丹太廟楹辛酉分立集賢院掌
 提調學校徵求隱逸召集賢良凡國子監道教陰陽祭祀占卜等
 事皆隸之初與翰林國史院同署至是分置兩院甲子敕工匠官毋遷轉是歲命哈刺哈
 孫為大宗正復改大理寺為大都護府始行賑糶法于京城設三
 舖發倉粟減其直糶之歲以為常以大都供應繁苦悉免軍民地

稅

二十三年丙戌春正月戊辰朔以皇太子故罷朝賀禁賞金銀銅
 錢越海互市壬午太陰犯軒轅太民癸未罷鞏昌二十四城拘權

所歸有司癸巳升隆興武寧縣爲寧州福州長溪縣爲福寧州降
鎮巢府爲巢州敘州爲縣丙申設諸路推官審理刑獄上路二員
中路一員二月巳亥禁用私斛斗秤尺乙巳罷山北遼東道宣慰
司立東京等處行中書省治咸平丙午太陰犯井丁未定按察司
副使以下每歲二月巡行分治十月還司癸丑復置隰州大寧縣
戊午併江南行樞密院四處入行省罷鬻江南學田癸亥太史院
上郭守敬所撰授時歷經及李謙歷議命宣付翰林國史院丙寅
召曲阜教授陳儼京兆蕭爨蜀人虞應龍修地理志儼爨不至三
月巳巳遣直學士程文海偕行臺官博采江南人才備臺察用太
陰犯婁甲戌省雲和署入教坊司立欽察衛親軍都指揮司乙亥
命麥朮丁仍中書右丞與郭佑並領錢穀楊居寬與銓選丙子定
行臺以八月巡行郡縣至次年四月中還務期遍歷癸巳歲星犯

壘壁陣夏四月庚子置燕南河東山東各道宣慰司濟南太原爲
諸王分地令各委官一人同治敕江南諸路財賦並隸中書省甲
辰徙杭州行臺治建康統淮東西湖南北浙東西江東西八道按
察司庚戌始制謚法己未以從官南方者秩滿多不歸遣使徙
北還初有旨凡爲盜者殺毋釋省臣疑太過帝曰朕以漢人徇私
用金泰和律斷事致盜賊滋衆故有是言人命至重今後非詳讞
者勿輒殺五月己巳熒惑犯太微西垣上將徙江東按察司治宣
州庚辰歲星犯壘壁陣乙酉熒惑犯太微右執法六月丙申朔太
白犯御女乙巳復立大司農司仍以所定農桑輯要書頒諸路戊
申括馬凡色目人有馬者三取其二民馬悉入官辛酉封楊邦憲
妻田氏永安郡夫人領播州安撫事秋七月己巳立營田總管府
嚴江南官田之爲強豪所據者復尚醞監隸光祿寺置中尚監庚

午徙江淮行省于揚州立洪澤南北三屯于淮南路之白水塘黃
家疇壬午總制院使桑哥具省臣姓名上奏丞相兪吉刺帶平章
阿必失合忽都魯一時皆罷癸巳定省院臺部官屬中書省除中
書令外左右丞相二員平章政事二員左右丞各一員叅知政事
二員行中書省除罷置丞相外平章政事二員左右丞各一員叅
知政事僉行省事並二員樞密院除樞密使外同知院事一員樞
密院副使僉樞密院事並二員院判一員御史臺御史大夫一員
中丞侍御史治書侍御史並二員行臺同內臺六部尚書侍郎郎
中員外郎各二員其餘並聽省臣酌汰詔諭中外曰惟我祖宗肇
造區夏雖中書已嘗建立而官制未暇舉行迨朕圖大以宅中思
欲繼志而述事集儒臣之公議法前代之鴻章爰立省部院臺以
正朝廷綱紀自疆土極照臨之遠致省臺有內外之分日益月增

官冗人濫常敕有司澄汰意必舊制遵承比聞近侍之言謂益曩時之弊彼不勝重任有壅上聞苟尚蹈匪彝時惟予咎其清冗職用復前規於戲官不必備惟其人恪守已成之憲爾尚克勤于乃事永肩圖報之心

見典章

八月己亥罷淮東宣慰司以黃蘄壽昌隸

湖廣行省安慶六安光州隸淮西宣慰司乙卯太白犯軒袁右角罷德平定昌二路置德昌軍民總管府九月乙丑朔海外諸番曰馬八兒曰須門那曰僧急里曰南無力曰馬蘭丹曰那旺曰丁呵兒曰來來曰忽闌亦解曰蘇木都刺凡十國各遣子弟來朝甲申太陰犯天關冬十月甲午朔太白犯右執法徙淞西按察司治杭州戊戌太陰犯建星壬寅太白犯左執法辛亥太陰犯東井河決開封祥符十五處調民夫二十餘萬分築隄防甲寅太白犯進賢壬戌徙甘州戍軍屯田亦里黑之地馬法國進鞍勒氈甲十一月

乙丑以張瑄朱清並爲海道運糧萬戶免徵覆舟糧戊辰太白犯
亢巳卯太陰犯井辛巳歲星犯壘壁陣禁禽獸孕時毋畋獵十二
月戊戌太白犯東咸丙午罷大有署丁未太陰犯井丁巳犯氐戊
午詔諸路分置六道勸農司宣慰司在內地者設官四員江南者
六員是歲大司農上諸路學校凡二萬一百六十六所植桑棗雜
樹二千三百九萬四千六百餘株蘇湖饑賑米二十萬石

二十四年丁亥春正月乙丑俱藍國遣使來朝甲戌太陰犯東井
乙酉犯房丁亥復改江浙省爲江淮行省辛卯立上林署二月庚
子太陰犯天關辛丑犯東井以麥朮丁平章政事范文虎爲中書
右丞商議樞密院事戊午敕諸王闔里鐵木兒節制諸軍乃顏遣
使徵東道兵諭闔里鐵木兒母輒發閏月癸亥太陰犯辰星定春
秋二仲上丙日祀平陽堯帝祠乙丑復分立尚書省以總制院使

桑哥及鐵木兒並平章政事阿魯渾薩理為右丞葉李為左丞馬

紹忻都並叅知政事惟行省事與中書共議餘聽尚書省從便奏

請辛未定國子監祭酒一員司業二員擇素有德望者居之建國

子學設博士二員助教四員生員百二十人蒙古漢人各半仍建

集賢院綱目云初太宗設總教國子之官迨至元初以許衡為祭酒而侍臣子弟就學者僅十餘人衡去教益廢且學舍未建師生寓民居屋至是始設監官建國學以耶律有尚為

祭酒增廣弟子員通考云令江南諸路縣學內各立小學選老成之士教之其他先儒過化之地並立書院凡師儒之命于朝者曰教授命于禮部及行省宣慰者曰學正學錄教諭山長路設

教授學正學錄各一員散府中上州設教授下州設學正縣設教諭書院設山長各一員設各省儒學提舉二員統諸路府

州縣學甲申太陰犯牽牛乙酉改淄萊路為般陽路罷江南竹木

柴薪魚牙諸稅復改各省為行尚書省六部為尚書六部庚寅法

司以諸路罪囚過多請遣官分道行刑帝曰囚非羣羊豈可遽殺

耶宜悉配隸淘金三月甲午更造至元寶鈔詔曰鈔法之行二十

餘載官吏奉法不虔以致物重鈔輕公私俱誦比者廷臣奏請謂

法弊必更古之道也朕思嘉之其造至元寶鈔頒天下中統鈔通

行如故以至元寶鈔一貫文當中統交鈔五貫文

凡錢一千文為貫每鈔一張直錢千文其法自

一貫至五十文凡十有一等

子母相權官民通用務在新者無冗舊者無廢上不虧

國下不損民凡歲賜周乏餉軍皆以中統鈔為準朕不食言故茲

詔示

見典章

丙申太陰犯東井乙卯遼東饑弛太子河漁禁丙辰降

重慶路定遠州為縣命都水監開汶泗水達京師汴河溢役夫修

故堤夏四月癸酉太陰犯氏甲戌犯房諸王乃顏反五月己亥移

濟南宣慰司治益都燕南按察司治大名南京按察司治南陽太

原按察司治西京壬寅戶工兩部各增尚書二員帝自將征乃顏

發上都括江南僧道馬以軍行免北京今歲絲銀經過郡邑各賑

鈔六月庚申朔百官獻馬給衛士壬戌帝至撒兒都魯之地乃顏

黨金家奴塔不歹率所部逼行在而陳遣前軍敗之王申帝駐蹕

于大利幹魯脫之地獲乃顏輜重千餘秋七月癸巳乃顏敗走追
執之其黨悉平丁酉宏州匠官以犬兔毛製如西錦者以獻授匠
官知宏州戊戌太陰犯南斗辛丑犯牽牛壬寅熒惑犯輿鬼庚戌
雲南金齒渠長打奔等兄弟內附壬子太陰犯司怪癸丑日暈連
環白虹貫之罷乃顏分地所署官移北京道按察司治豪州以河
西瓜沙等州立闍鄜屯田八月癸亥太白犯亢乙丑車駕還上都
置江南四省交鈔提舉司己巳謫從叛諸王軍前自効浚亦集乃
路河渠丙子填星犯壘壁陣己卯太陰犯天關辛巳犯東井甲申
太白犯房丁亥立豐贍昌國濟民三署女人國貢海人九月丁酉
熒惑犯長垣庚子太白犯天江乙巳太陰犯畢戊申咸平懿州北
京以乃顏叛民廢耕作告饑賑糧五萬石辛亥熒惑犯太微西垣
止將壬子太白犯南斗冬十月戊午朔日食壬戌太陰犯牽牛大

星丙子桑哥檢覈中書錢穀矯殺叅知政事郭佑楊居寬乙酉羅
北甸士官火者阿禾及維摩合刺孫之子並內附是夜熒惑犯左
執法十一月壬辰太白犯壘壁陣月暈金土二星命桑哥為尚書
右丞相兼統制院使領功德使司事阿魯渾薩理平章政事葉李
轉右丞馬紹為左丞丙申熒惑犯太微東垣上相戊戌調新附軍
屯田合迷玉速曲之地庚子太白晝見辛丑改衛尉院為太僕寺

隸宣徽院

元制牧地東越耽羅北踰火里禿麻西至甘肅南暨雲南凡十四處自上都大都以至玉你伯牙折連怯呆兒周廻萬里自冬至夏隨地行逐水草十月各還本地

歲遣官閱視見在數目造冊奏聞自中統四年設羣牧所官名數更至是始有定屬

丙辰熒惑犯進賢十二月定告病官

限期三年以下者敘用五年以下者降一等七年以下者降二等

七年以上者不敘

見典章

癸亥立尚乘寺金竹寨主搔驢等以所部

百二十五寨內附丙寅太白晝見太陰犯畢丁卯減揚州歲額米

十五萬石以鹽引五十萬道易民糧免浙西魚課發河西甘肅富

民往闔鄜與漢軍雜居屯植癸酉諸王薛徹都所駐之地雨土七晝夜羊畜盡死以鈔幣綿布雜給之是歲始立行泉府司專掌海運增萬戶府為四遂罷東平河運

二十五年戊子春正月庚寅祭日于司天臺辛卯毀中統鈔板戊

戌弛遼陽漁獵禁勿捕天鵝殺鹿羔癸卯海都犯邊命諸王木伯

統兵北征乙巳太陰犯角戊申犯房辛亥省器盒局入諸路金玉

人匠總管府癸丑設江南行大司農司及淮東西兩道勸農營田

使舉察勤惰歲具有司勸課實蹟為殿最通考云御史大夫完者帖木兒奏江南諸道行臺于紹興路開設近

因道梗湖南北廣東西海北江西福建諸處凡有文書北至南臺風信不便徑申內臺二月壬未委事情虛實宜于福建置分臺給印信俾湖南諸道文書由外臺以達內臺

戌省遼東海西道按察司入北京江南湖北道按察司入荆南改

南京為汴梁路北京為武平路西京為大同路東京為遼陽路中

興為寧夏府路以江西茶運司兼權酒醋稅徵葛洪山隱士劉彥

深赴京已卯以江南站戶貧富不均命有司料簡合戶稅至七十石置備驛馬一匹並免雜徭獨戶稅逾七十石願入站者聽合戶稅不得過十戶獨戶稅無上百石其使臣供應官爲支給毋累站戶辛巳以杭州西湖爲放生池命皇孫雲南王也先鐵木兒帥兵鎮大理三月丁亥熒惑犯太微東垣上相戊子太陰犯畢庚寅改闕遺所爲監己亥太陰掩角壬寅命會同館倣古職貢制繪爲圖俟番使至詢其風俗土產去國里程籍錄以進夏四月戊午太陰犯井庚申用桑哥言鉤考應昌和糴所其扈從諸臣種地多者依軍站例除四頃外計畝征租癸亥渾河決發軍築堤戊辰浚怯烈河溉口溫騰兒黃土山民田廣東賊董賢舉等七人皆稱大老聚衆剽掠吉贛南韶雄汀諸郡甲戌萬安寺成佛像窗壁皆用金爲飾增建直沽海運倉甲申命皇孫鐵穆耳行邊討乃顏餘黨削平

遼左諸部置東路萬戶府五月戊子諸王察合子濶濶帶叛樞密
副使土土哈執之以來丙申元馬兒來獻璞玉己亥遣官分道鉤
考申統鈔本升雲南北勝施州爲北勝府戊申太白犯畢孟州烏
河川雨雹大如拳癸丑遷四川省治重慶宣慰司治成都河決汴
梁太康通許皆被害六月辛酉定各御史任滿驗所言事大小多
寡爲升降甲戌太白犯井改西南番總管府爲永寧路丁丑太陰
犯歲星發兵千五百人詣漠北浚井秋七月甲申朔復葺興靈二
州倉轉米備賑壬辰改會同館爲四賓庫儲待所爲提舉司己亥
熒惑犯氏庚子太白犯鬼乙巳太陰掩畢保定路野蠶蠶絲可爲
帛八月丙辰熒惑犯房己未太白犯軒轅大星癸酉以河間鹽運
司兼管順德廣平棊陽三鐵冶庚辰分萬億庫爲寶源賦源綺源
廣源四庫九月癸未朔熒惑犯天江乙未罷檀州淘金戶諸王篤

哇犯邊庚子太陰犯畢鬼國建都皆遣使來貢營五庫于禁中以貯幣帛癸卯熒惑犯南斗南臺御史中丞劉宣自殺庚戌集賢院新編本草成冬十月庚申從桑哥請置徵理司遣省院臺官十二人理算江淮江西福建四川甘肅安西六省錢穀給兵以衛其行甲子置虎賁司尋改武衛司丙寅置湖廣溪洞蠻獠四總管府統州縣洞百六十所用漢人爲達魯花赤雜土人治之丙子敕造鐵羅圈甲及長甲給北征軍遣瀛國公趙鼎學佛于吐番巳卯免儒戶雜徭學田所入羨餘收貯集賢院以給多才藝者十一月丁亥以何榮祖叅知政事禁有分地之家私役富民爲柴米戶及賦外雜徭巳亥立桑哥輔政碑甲辰改總制院爲宣政院掌釋教遇吐番有事則分院往鎮因唐制吐番來朝見于官政殿故名十二月丁巳海都兵犯邊拔都也孫脫迎擊死之辛酉太陰犯畢甲子犯井甲戌犯亢熒惑犯壘

壁陣丙子也速不花以昔列門叛甘肅行省約諸王八八拜答罕
駙馬昌吉合兵討之皆自縛請罪獨昔列門西走追執之歸于京
師是歲置醴源倉罷安和署以光祿寺直隸都省升滄州軍營城
爲滄溟縣大司農上墾地三千五百七十頃積義糧三十一萬五
千餘石

二十六年己丑春正月丙戌京師地震發兵塞沙陀間鐵烈兒河
辛卯行泉府使沙不丁上市舶司歲輸珠四百斤金三千四百兩
帝命貯之以待貧者辛丑立武衛親軍都指揮使司掌修治城隍
及京師內外工役分侍衛軍萬人隸之是夜太陰犯氏癸卯罷膠
萊海道運糧萬戶府循州賊鍾明亮寇贛南掠寧都據秀嶺與廣
東董賢舉台州楊鎮龍柳世英相應戊申徙廣州按察司治韶州
以荆南按察司所統遼遠割三路入淮西二路入江西從壽張尹

韓仲暉言開河以通運道起須城縣安山西南由壽張西北至東
昌又西北至臨清引汶水達御河二月辛亥朔置延禧崇福二司
徙江淮行省治杭州改浙西道宣慰司為淮東道治揚州自泉州
至杭州立海站十五專運番糞貢物及商販奇貨丁卯命右丞相
伯顏知樞密院事鎮和林統有漠北諸路置知院自此始諸王合丹寇開元
己巳立左右翼屯田萬戶府統軍二千于霸州河間耕田甲戌命
鞏昌總帥汪惟和將部軍萬人北征三月庚辰朔日食詔亡宋係
官田土歸附以來被權豪影占及指熟作荒詭名避役者許自首
官從前應收子粒概行免徵仍令佃種見典立雲南屯田以供軍

儲元初用兵遇堅城大敵必屯田守之海內既一於是內而各衛外而行省且屯田以資軍餉
考陝洪澤甘肅瓜沙因昔人之制和林陝西四川則因地之宜而始為之至于雲南八番海南
海北雖非屯田之所而以蠻獠腹心地又制兵屯旅控扼之由是天下無不
可屯之兵無不可耕之地而雲南屯事又與中原不同其田皆以雙計云

甲午太陰犯

亢乙未新鑄渾天儀成以黃金為飾癸卯金齒人塞完以其民二

十餘萬戶來歸夏四月戊午禁民挾弓矢犯者籍為兵省江淮屯

田打捕提舉司七惟存徐邳海州揚州兩淮淮安高郵昭信安豐

鎮巢蘄黃魚網石湫十二所庚午沙河決發民築堤障之甲戌置

浙東江東江西湖廣福建木棉提舉司責民歲輸木棉十萬疋福

建叅政魏天祐執宋江東制置使謝枋得至燕不屈死大方通鑑載枋得致天祐書云

大元制世民物一新宋室通臣只欠一死其所以不死者以九十三歲之母在耳先妣既已考終某自今無意人間事矣大元慈仁如天不妄殺一忠臣義士其所以寧為民不為官者忠臣不事

二君此天地間常道也今蒙大元五次以禮招徠上有堯舜下有巢由上有湯武下有隨光其所

以効虞人之死而不往學夷齊之死而不仕者正欲使天下後世知大元之量能使謝某不失臣節視死如歸也今蒙叅政拘管道院日勞吏卒監守其憂慮亦大勞矣且問叅政容一謝某聽其

為大元閉民于大元何損殺一謝某成其為大宋忠臣于大元何益特恐前悞大宋後悞大元者公自無面目立于天地耳某母喪未葬只當衰絰入君門倘大元有命惟有歷寫江南官吏貪酷

生靈愁苦之狀作萬言書獻之一聽進退并求速死以愧世之為臣不忠者天祐讓之曰封疆之臣當死封疆安仁之敗何不死枋得曰程嬰公孫祥曰二人皆忠于趙一存孤一死節一死于十五年之前一死于十五年之後皆不失為忠臣蓋棺論定叅政豈足以知此枋得北行在途惟茹

蔬果積數月困甚至五月庚辰發武衛親軍濬河西務漕渠及口温腦

燕甫四日卒于驛館

兒河壬辰太白犯鬼發大同宣德民築倉於昴兀刺之地丙申以

季陽益都淄萊三萬戶軍久戍廣東疫死者衆令二年一更賊首
鍾明亮率衆降令赴闕江淮省臣逗留不遣丁酉復徙行御史臺
于揚州浙西按察司于蘇州以忻都爲尚書省左丞張天祐爲中
書省叅知政事己亥設回鶻國子學罷永盈庫以上供幣帛入太
府監辛丑御河溢入會通渠漂東昌民廬改莊浪路隸安西省省
流江縣入渠州青山猫蠻三十三寨內附六月戊申朔詔雲南地
遠六品以下官許本省選辟復正雲南按察司西番進黑豹庚申
諸王乃蠻帶敗合丹兵于托吾兒河丙寅海都犯邊和林宣慰使
怯伯起兵應之乃顏餘黨金家奴並入寇甲戌西南彝中下爛土
洞四百一十寨四川山齊蠻民四寨相繼來降立江淮財賦總管
府掌所籍宋太后貲產隸中宮秋七月戊寅朔帝親征海都辛巳
安山渠成長百五十里建牐三十賜名會通河戊子太白經天辛

卯太白犯牛發和林所屯乞兒乞思等軍北征賦百官家製戰襖
乙未太陰犯歲星癸卯沙河溢鐵燈杆堤決八月辛未歲星晝見
癸酉升四川金竹寨爲府徙瀾東道按察司治婺州河東山西道
按察司治太原宣慰司治大同九月戊寅歲星犯井丙戌罷濟州
泗汶漕運司乙未太陰犯畢丙申熒惑犯太微西垣上將冬十月
癸丑太陰犯牛宿距星甲寅熒惑犯右執法乙卯改八番羅甸隸
湖廣丙辰禁內外官受人饋酒食違者籍其家貲之半閏月戊寅
車駕還大都庚辰敕商販有中統料鈔者聽易至元鈔行用丙戌
西南彝生番心樓等八族內附鍾明亮復反韶雄諸賊響應江淮
省合兵討之獲賊首董賢舉丘應祥歸京師丁亥辰星犯房巳丑
太陰犯畢熒惑犯進賢丙申婺州賊葉萬五寇武義縣庚子取石
于泗濱作磬以補宮縣之樂辛丑羅斛女人二國遣使來貢十一

月丙午朔漳州賊陳機察邱大老張順等以其黨降命赴闕丁巳
改播州爲播南路升平恩鎮爲邱縣戊辰太陰犯亢十二月辛巳
括天下馬一二品官許乘馬五三品三四五品二六品以下皆一
餘悉拘入官乙酉太白犯南斗命司天臺祭熒戒丁亥封皇子濶
濶出爲寧遠王甲午以汪惟能爲征西元帥將所部軍入漠北其
先戍漠兵毋令還翼詔天下梵寺所貯藏經集僧看誦仍給所費
歲爲例駕幸大聖壽萬安寺置旃檀佛像是歲紹興安西甘州大
水兩淮雨雹大都路霖雨害稼東平蝗各蠲租減糶如例伯顏遣
使告邊民饑詔賜網罟取魚自給

二十七年庚寅春正月庚戌太白犯牛癸丑太陰犯井救從臣子
第入國子學乙卯造祀天幄殿丙寅改儲衛司爲軍儲所復立興
文署掌經籍板及江南學田丁卯熒惑犯房己巳改西南番總管

府為永寧路降臨淮府為盱眙縣二月乙亥朔立全羅道萬戶府

戊寅太陰犯畢辛巳括河間昔寶赤戶口輟耕錄云昔寶赤鷹房之執役者每歲以所養海青獲頭鵝首者賞

金一錠頭鵝天鵝也以首得之又重過三十斤且以進御膳故曰頭癸未泉州地震丙戌改奉先縣為房山巳

丑賊首鍾明亮復降詔械致闕下庚寅太陰犯亢辛卯發虎賁更

休士赴上都修城乙未改雲南蒙憐蒙萊二甸俱為路羅羅斯貢

兩壇三月壬子熒惑犯鉤鈴巳未放福建獵戶沙魚皮戶為民發

雲州民夫鑿銀洞庚申罷行司農司及各道勸農營田司增按察

司僉事二員總勸農事徙四川省仍治成都立江南營田提舉司

掌僧寺貲產置金竹府大隘等四十二砦蠻彝長官甲子楊震龍

餘眾掠浙東討賊者多俘良民敕行臺揀放夏四月癸酉朔發六

衛漢軍萬人伐木修城丙子太陰犯井壬辰熒惑守氏十餘日遣

使詣馬八兒國訪求方伎士五月戊申鍾明亮復叛寇贛州戊午

罷江西行院移省治吉州罷奉宸庫復立安和署乙丑太陰犯填
星乙巳立雲南行御史臺及銀場官庚午括天下陰陽戶口仍立
各路教官有精于藝者歲貢各一人六月壬申朔升閩鹽州爲柏
興府降普樂州爲閩鹽縣金州爲金縣河溢太康沒民田三十二
萬餘畝免其租甲戌桑州總管黃布蓬邠州長羅光寨安郡州長
閉光過率蠻民萬餘戶內附丙子繕寫金字藏經成凡糜金三千
二百餘兩已丑熒惑犯房丁酉定宗實錄成秋七月丙午禁平地
忙安倉釀酒犯者死癸丑江淮平章沙不下言倉庫官侵盜公裕
請依宋法黥而斷其腕帝曰此回鶻法也不允戊午貴州猫蠻作
亂劫順元路免大都歲賦絲及酒醋課辛酉熒惑犯天江丙寅雲
南閣力白衣甸渠長內附八月辛未朔日食併廣東道真陽洽光
二縣爲英德州丁亥復徙川南道宣慰司于重慶癸巳地大震武

平地陷黑沙木涌出壓溺死者七千二百餘人壞民居無算遣平
 章鐵木兒往視九月癸卯歲星犯鬼乙巳禁諸王遣僧建寺擾民
 諸王閣里鐵木兒與合丹戰于瓦法大破之丁未御河決高唐沒
 民田命有司塞之戊申鐵木兒至武平以便宜蠲租賦罷商稅弛
 酒禁斬為盜者轉海運米萬石賑之金竹知府搔驢招降竹古弄
 古魯花等三十餘寨詔立縣設長官總把叅用土人丁卯命江淮
 省鈎考行教坊司所總江南樂工租賦通考云和穆西京和穆其價每十兩已上增二兩冬十月王
 申封皇孫甘麻刺為梁王出鎮雲南丁丑江陰寧國大木民流移
 者四十五萬戶尚書省入告帝曰此亦何待上聞當速賑之凡出
 粟五十八萬三千餘石辛巳太白犯斗乙酉梁洞梁宮朝吳曲洞
 吳湯暖等二十族內附己丑新作太廟登歌宮縣樂罷昔寶赤歲
 取鷓鴣于成都十一月戊申太陰掩填星詔瀾東盜賊竊發復立

三萬戶一戍沿海一戍溫處一戍紹興婺州其揚州建康鎮江三
城雄跨大江置七萬戶杭州庫藏所在置四萬戶并瀕海要害處
各增戰船分兵演習水戰庚戌罷雲南會川路采碧甸子辛酉太
陰掩左執法壬戌太宗實錄成癸亥河決祥符義唐灣陳穎二州
皆被患甲子徙河北河南道按察司治許州乙丑易水溢漂沒雄
莫任丘新安田廬命有司築堤障之丁卯降南雄州爲保昌縣韶
州爲曲江縣十二月戊寅免大都平灤保定河間歷年逋租十三
萬五百餘石辛卯太陰犯亢乙未摘蒙古軍萬人戍雙城及娑娑
府以防合丹兵己亥降溧陽路爲縣湖廣省上宣課珠九萬五百
一十五兩青田賊劉甲乙集衆萬人寇溫州是歲河北十七郡蝗
江西霖雨瀕河水溢各蠲賑如例發粟六萬二千石賑通州河西
務流民

二十八年辛卯春正月壬寅太白熒惑填星聚于奎癸卯備民運米十萬石致上都糶賑丁巳遣貴由赤四百人北征辛酉罷江淮漕運司專事海運升安慶府爲路降無爲和州二路及六安軍爲州巢州及懷遠軍爲縣免江淮積遺糧三百一十萬六千餘石鈔千一百五十錠絲綿六千八百餘斤壬戌桑哥以罪罷二月辛未徙萬億庫金銀入禁中富寧庫癸酉改福建行省爲宣慰司隸江西詔行臺勿聽行省節度丙子罷徵理司丁丑命完澤爲尚書右丞相不忽木平章政事己卯立雲南金齒曲靖二宣慰司管軍萬戶府辛巳以桑哥沮抑臺綱數箠御史命省臺官論定其罪帝曰桑哥爲惡始終四年臺臣豈不知之知而不言當得何罪侍御史桂思敬曰奪官追俸惟上所裁遂罷臺臣之久任者癸未太陰犯左執法甲申太白犯昴乙酉立江淮湖廣江西四川行樞密院

江淮治建康湖廣治鄂州江西治贛州四川治成都丙戌改提刑

按察司爲肅政廉訪司每道仍設官八員副使以下各分臨所部

典章云不得苛細生事暗于大體違者罰同不職

以何榮祖爲尙書右丞賀勝叅知政事丁亥建

周廬于宮城南分居宿衛士癸巳踣桑哥輔政碑籍其家三月已

亥朔加嶽瀆四海封號詔曰朕惟名山大川國之秩祀今嶽瀆四

海皆在封宇之內民物阜康時惟神庥而封號未加無以昭答景

貺可加上東嶽齊天大生仁聖帝南嶽司天大化昭聖帝西嶽金

天大利順聖帝北嶽安天大貞元聖帝中嶽中天大寧崇聖帝江

瀆廣源順濟王河瀆靈源宏濟王淮瀆長源博濟王濟瀆清源善

濟王東海廣德靈會王南海廣利靈孚王西海廣潤靈通王北海

廣澤靈祐王仍各遣官詣祠致告以稱朕敬恭神明之意

見典丁

未太陰犯御女巳酉犯右執法庚戌犯太微東垣上相乙卯太白

犯五車辛酉建紫檀殿壬戌南丹州莫國麟入覲授安撫使禁江

淮富家賄充府縣卒史隱庇差賦累及貧民夏四月甲戌以地震

故免武平今歲徭役乙未歲星犯輿鬼上都饑斗米銀四兩禁宰

牝羊弛杭州西湖禽魚禁五月戊戌以廉希恕為湖廣右丞陳仲

達不顏于思王信並同知海北海南道事將兵征黎蠻立左右兩

江宣慰司都元帥府壬寅太陰犯少民辛亥罷大都燒鈔庫及江

南歲輸木棉下桑哥于獄誅其妻黨湖廣平章要束木燕南宣慰

司八吉由癸丑罷尚書省政事悉由中書甲寅太陰犯牛丁巳建

白堊二各高丈二尺以居咒師彙四的性吉等七人右丞何榮祖

進所撰至元新格帝命鈔版頒行己未以門答占復為御史大夫

行御史臺事通考云以至元新格定科差法諸差稅皆可縣正官監視人吏置局均科出給由帖俾民通曉諸大役皆先富強後貧弱貧富等者先多了後少丁

六月丁卯朔立黃平元帥府改隸播州乙酉洗國王洞主市備什王

六

第同來朝辛卯太陰犯畢拘汴梁逃人男女配偶成家給農具耕
種禁蒙古人往回鶻地爲商秋七月丙申朔置建都金冶令旁近
民煉金輸官己亥太白犯井戌申罷江南諸省買銀提舉司招集
亡宋涅手軍得八萬三千八立萬戶千百戶領之丁巳桑哥伏誅
其弟鞏昌宣慰使答麻刺答思懼罪自殺募民耕江南曠土戶不
過五頃官授之券爲永業己未降江陰路爲州宜興府爲縣分華
亭之上海爲縣壬戌弛畿內秋耕禁八月乙丑朔平陽地震壞民
舍萬八百二十六區丙寅太白犯輿鬼己巳罷江西行泉府司大
都甲匠總管府廣州人匠提舉司丙子太陰犯牽牛癸未歲星犯
軒轅大星戊子太白犯軒轅大星及歲星遣使詣雲南捕黑虎咀
喃番邦進金書寶塔及黑獅子癸巳太陰掩熒惑命工部造飛車
九月辛丑立行宣政院治杭州庚戌太白犯右執法丙辰熒惑犯

左執法戊午太白犯熒惑辛酉歲星犯少民命尚衣局織無縫衣

通考云詔路州縣除違管花赤外長官並選用漢人佐貳官色口漢人參用冬十月乙丑朔羅斛國王上金表貢黃

金象齒丹頂鶴五色鸚鵡翠毛犀角篤縹龍腦等物癸未罷各省

行樞密院入行省丙戌太陰犯軒轅大星并御女丁亥洞蠻爛土

立定雲府升陳蒙洞及合江俱為州中書省定蠻洞歲進馬五十

及兩氊佩刀丹砂雌雄黃諸物率二歲一上帝曰從其所為勿加

過督己丑太陰犯太微東垣上相癸巳免衛輝種仙茅戶徭役十

一月甲辰太白犯房丙午熒惑犯亢丁未太陰犯畢甲寅犯歲星

乙卯新添葛蠻洞官阿汾青貴來貢立葛蠻軍民安撫司戊午金

齒國遣阿腮入覲庚申熒惑犯氏辛酉徵太子贊善劉因不起增

置望雲銀冶十二月乙丑籍探馬赤六萬戶成丁者為兵宋全太

后瀛國公母子已為僧尼有地三百六十頃詔免其租壬申立河

南江北行省治汴梁甲戌罷諸路鉤考錢穀取歷年逋負交贖置

一室非上命而竊視者加罪庚辰太陰犯御女改江淮行省為江

浙行省治杭州癸未太陰犯太微東垣上相八番洞官吳金叔等

以部民二萬有奇內附己丑熒惑犯房庚寅犯鉤鈐改營田提舉

司為規運提點所辛卯詔釋天下囚非殺人者戶部上天下戶數

內郡一百九十九萬九千四百四十四江淮四川一千一百四十

三萬八百七十八游食者四十二萬九千一百一十八宣政院上

天下寺宇四萬二千三百一十八區僧尼二十一萬三千一百四

十八人通考云詔頒農桑雜令每村以五十家立一社擇高年曉農事者為長教督農民凡種

田者立碑版于田側書某社某人子入社長以時勸戒不幸者籍其姓名以授提點官

大畜所犯子門候改過除之不改則罰其代充本社夫役又每丁課種棗二十本雜果十本土性

不宜者種榆柳如數各社多種青楮以訪讎近水之家許鑿池養魚收鵝鴨蒔蓮藕葦茨蒲葦以

助衣食荒闕之地悉以付民
每年十月令州縣正官巡視
二十九年壬辰春正月甲午朔日食左右有珥上有抱氣免朝賀

己亥復置都水監以郭守敬兼領監事遣官分視黃河堤堰庚子

改八番羅甸爲普定府隸雲南罷福建銀鐵提舉司禁商賈私以

金銀航海甲辰詔江南學田歲入聽其自掌春秋釋奠外以廩師

生之無告者貢士莊田仍令核數入官丙午罷河南宣慰司以汴

梁襄陽河南南陽歸德隸河南省復割湖廣之德安漢陽信陽隸

荆湖北道蘄黃隸淮西道并准東道三宣慰司咸隸河南省其荆

湖北道舊領辰沅澧靖歸常德者直隸湖廣省戊申太陰犯歲星

及軒轅左角己酉罷四賓庫仍置會同館立織造段疋提舉司改

陳蒙爛土軍民安撫司隸八番都元帥以土人爲使二月甲子朔

金竹蠻長貢馬羶各二十七詔減所部貢馬賜新附黑蠻衣襖遣

回命進所產丹砂雄黃之精者己巳除問刑官鞭背法太陰犯畢

庚午桑州生貓羅甸國古州等峒蠻籍所部民十一萬九千三百

餘戶來獻乙亥立總管高麗女真漢軍萬戶府己丑歲星犯軒轅
大星遣諸王之從逆者于各邊俾從軍自効三月丁未治桑哥黨
納速刺丁滅里忻都王巨濟皆伏誅命省臺定贓罪十三等枉法
者五自一貫至十貫笞四十七起至百貫以上笞一百七不枉法
者八自一貫至二十貫笞四十七起至三百貫以上笞一百七罪
入死者以聞

元制笞杖俱以七爲
計蓋每十減爲七也

己酉以鐵哥平章政事阿里爲右丞梁

德珪叅知政事併亦奚不薛及八番羅甸二宣慰司都元帥府爲
一仍令亦奚不薛隸湖廣羅甸還隸雲南夏四月丙子太陰犯氏
己卯弛甘肅太原酒禁仍權酷辛卯設雲南諸路學校其教官以
蜀士充之五月丁未詔雪楊居寬郭佑寃給還家產改思州安撫
司爲軍民宣撫司隸湖廣罷東平路河道提舉司入都水監六月
戊辰詔聽僧食鹽不輸課壬申鐵旗城後察昔折乙烈率部曲三

千餘戶來附甲戌置司籍庫以儲物之籍入者壬午以瓊州新附

洞寨置會同定安二縣已丑太白犯歲星

典章云許蒙古軍人立社禁採生祭鬼及製造異樣器物

閏月

辛卯朔罷福建歲造象齒鑿帶戊申熒惑犯狗國辛亥廣西上思

州上官黃勝許陷忠州遣程鵬飛將兵擊之勝許敗走入交阯甲

寅右江岑從毅降以其子斗榮襲鎮安路總管廣南副使養甫丁

以風聞三十餘事訐告省官帝惡其傷政體捕惡黨下吏如法秋

七月庚申朔遣使檢覈竄名鷹房受糧者辛未太陰犯牛庚辰定

雲南福建兩廣州縣官聽省臺銓選具姓名上聞給授宣敕八月

丁酉辰星犯右執法已亥太白犯房乙巳歲星犯右執法丙午用

郭守敬言浚通州至大都漕河役軍匠二萬人又鑿六渠灌昌平

諸水戊午福建叅政魏天祐私發民夫鍊銀坐贓逮治敕廉訪司

在燕南者還治真定河南者還治汴梁九月丁卯菲薙十圍安化

光蘭州洞蠻內附卽其地立定遠府設官如例癸酉廢新得州置
通江縣復漢州綿竹縣徙瓜沙二州民于甘肅畫地使耕寧夏半
藝紅花詔令盡種穀麥辛巳太白犯南斗罷雲南行臺徙置西川
設雲南廉訪司丁亥置烏思藏納里速古兒孫等三路宣慰司冬
十月戊子朔召福建廉訪知事張師道赴闕授翰林直學士庚寅
浚浙西河道導水入海癸巳詔歲終各行省詣闕奏事令行臺同
赴面奏一歲舉刺之數丙申四川洞蠻向思聰等來朝信合納帖
音國遣使入覲廣東進暹國所上金冊乙巳太陰犯井丁未犯鬼
癸丑罷懷孟竹課乙卯太陰犯氏諸王明里鐵木兒附海都叛詔
伯顏討之率衆來降十一月詔父子嗣續人倫大本同宗繼紹氣
脉感通非我族類神不歆享凡有撫養諸弟從孫爲子及螟蛉他
姓者並行禁治老人年八十以上者准免一子徭役俾得侍養

見典

章
壬戌太陰犯壘壁薄己卯犯太微東垣上相癸未命關津譏察
姦宄丙戌提省溪錦州銅人諸洞渠長楊秀朝木忽魯甸土官阿
魯等入覲十二月庚寅改封皇孫梁王甘麻刺爲晉王鎮北邊立
金齒木來府癸巳罷福建及寧國路銀冶庚子太陰犯井甲寅犯
太微西垣上將勅都水監修治保定沙塘河堤堰是歲真定河間
益都各屬州縣蝨食桑盡無蠶兩浙饑免民租一百二十五萬七
千餘

三十年癸巳春正月壬戌遣使招諭漆頭金齒蠻丙寅太陰犯畢
詔汰冗員省內外官府二百五十五所計六百六十九員丁卯罷
雲南延慶司遙授洛波卜兒二蠻長爲知州捏怯烈女真數百人
以漁自給帝曰與其勤于水曷若力于田其給牛具令屯耕以食
庚午驗洞蠻長楊總國等來朝甲戌升蔡州爲散府分和林漢軍

屯田杭海罷諸路魚鹽局而子西番一甸蠻長三人來覲各授蠻
彝軍民官丁丑太陰犯氏庚辰歲星犯左執法丞相安童卒新置
社稷壇成高五丈方廣如之社東稷西社用白石爲主飾以五方
色土稷不用主四周皆黃土壇南各植松一株北墉瘞坎壇垣悉
倣古制別爲齋廡門廡三十三楹二月己丑減江浙海運米四十
萬石免大都公賦壬辰太陰犯畢丙申却江淮福建所進鷹鷄仍
禁軍官無從禽擾民丁酉回鶻獻答納珠邀價數萬帝曰珠何爲
哉當留是錢以賙貧者發海運米十萬石給遼陽戍兵乙巳熒惑
犯天街丁未以新附洞蠻吳動熬爲潭溪軍民官庚戌太陰犯牛
辛亥發總帥汪惟和所部軍征土番陝西四川兵征西番復立雲
南行御史臺救江南豪右庇匿盜賊爲首者誅餘徙之內地癸丑
太白犯壘壁陣三月庚申以札散知樞密院事甲子海都入寇括

天下馬十萬匹己巳立行大司農司辛未太陰犯氏夏四月己亥

定上海漕浦慶元廣東泉州市舶司物貨皆三十取一併温州舶

司入慶元杭州舶司入稅務通考云凡金銀銅鐵男女並不許私販入番行省行泉

待船船至先封其塔以次抽分尋又以船船癸丑太白犯填星甲寅授光州光龍

至岸隱漏物貨者多命就海中逆而關之等十二人邦岸王文顯等二十八人金竹馬麟等十六人大龍番

禿盧忽等五十四人永順路彭世疆等九十八人安化州吳再榮等

十三人師壁散毛洞勾答什王等四人各為蠻獠官賜璽書遣歸

毀江南諸道觀聖祖天尊祠五月丙辰朔定雲洞蠻來附丙寅浙

西大水令富民募人疏決水道辛未定僧寺邸舍並收商稅丁丑

散上都工匠三千戶俾就食大都六月丙戌選河西質子軍赴皇

孫阿難答所出征己丑歲星犯左執法庚寅以雲南且當仍屬西

番宣慰司改淮西蘄黃等路隸河南江北行省丙申太陰犯斗乙

已以皇太子寶授皇孫鐵穆耳總兵北邊召丞相伯顏還己酉濬
太湖秋七月己未免福建歲輸皮貨及泉州織作紵絲甲子太陰
犯建星壬申命月赤察兒知樞密院事丁丑新開通州漕河成賜
名通惠河以只兒合忽所汰乞兒吉思戶屯田合思合之地辛巳
太陰犯鬼八月丙戌括所在荒田令放良漏籍等戶屯種甲午辰
星犯太微丙垣上將甲辰太陰犯畢丁未立鎮守黎蠻海北海南
屯田萬戶府戊申太陰犯鬼九月癸丑朔立海北海南博易提舉
司稅如市舶例丁卯太陰犯畢出御史臺贓罰鈔五萬錠給衛士
之貧者冬十月癸未朔皇太子紉于太廟戊子修汴梁堤己丑遣
兵部侍郎忽魯禿花等使閣藍可兒納答信合納帖音三國仍賜
信合納帖音渠長三珠虎符庚寅彗星入紫微垣抵斗魁光芒尺
許凡一月乃滅丙申熒惑犯亢己亥太陰犯天關辛丑犯井甲辰

詔赦天下庚戌造象蹄掌甲辛亥禁江南州郡乞養良家子轉相
 販鬻及強將平民畧賣者十一月壬子朔立海北海南道肅政廉
 訪司治雷州庚申以金齒木朶甸戶口增立下路總管府給其長
 雙珠虎符乙丑太陰犯畢丁卯犯井庚午犯鬼丙子熒惑犯鉤鈴
 戊寅歲星犯亢免江南都作院軍匠出征已卯召河南行省平章
 伯顏入中書省平章政事十二月壬辰以張九思為左丞乙未太
 陰犯井是歲天下路一百六十九府四十三州三百九十八縣千
 一百六十五宣撫司十五安撫司一寨十一鎮撫所一堡一各甸
 部管軍民官七十三長官司五十一錄事司百三巡院三官府大
 小二千七百三十三處真定深州靜安大水登州大興蝗易州雨
 雹如雞卵各蠲賑有差通考云改江南茶法每茶商貨茶必令賣引引之外
 又有茶由以給賣零茶者每由茶九斤收鈔一兩
 三十一年甲午春正月壬子朔帝不豫免朝賀知樞密院伯顏至

自軍中庚午帝大漸癸酉崩于紫檀殿在位三十五年壽八十七
亥葬起輦谷夏五月戊午上尊諡曰聖德神功文武皇帝廟號世
祖國語曰薛禪皇帝

田曰遂闢雄圖混一中外德威所指無遠弗届建號立制垂
模一代崇儒察奸旋用旋敗英明克斷用無祇悔